

駢

體

文

鈔

駢體文鈔卷二十三

碑記類

漢修西嶽廟記

一作碑

醇質近先泰

山經曰泰華之山削成四方其高五千仞廣十里周禮職方氏華謂之西嶽祭視三公者以其能興雲雨產萬物通精氣有益於人則祀之故帝舜受堯歷數親自巡省設五鼎之奠升柴燎煙致敬神祇又用昭明百穀繁殖黎民時雍鳥獸率舞鳳皇來儀暨夏殷周末之有改也其德休明則有禎祥荒淫臊穢篤災必降秦違其典璧遺鄣池二世以亡高祖應運禮遵陶唐祭則獲福奕世克昌亡新滔逆鬼神不享建武之初彗掃頑凶更率舊章敢用元牡牲牷必充天惟醇祐萬國以康光和二年有漢元舅五侯之胄謝陽之孫曰樊府君諱毅字仲德承考讓國家于河南究

職州郡辟公府除防東長中都令誅强競撫瘠民二鄣以清命守斯邦威隆秋霜恩踰冬日景化旣宣由復夕惕惟窺祿之報順民之則孟冬十月齊祀西嶽以傳窄狹不足處尊卑廟舍舊久牆屋傾亞世室不修春秋作譏特部行事荀班與縣令先黨以漸補治設中外館圖珍奇畫怪獸嶽瀆之精所出禎秀役不干時而功已著覽勞久逸神永有憑自古太山邱邑猶存五嶽尊同哀此勤民獨不賴福乃上復十里內工商嚴賦克厭帝心嘉瑞仍畱風雨應卦泚潤品物君舉必書况乃盛德惠及神人可無述焉於是功曹郭敏主簿魏襲戶曹史許禮等遂刊元石銘勒鴻勛垂曜靈軫存有昭識其辭曰二儀剖判清濁始分陽凝成山陰積爲川泰氣推否洪波况臻堯命伯禹決江開汶川靈旣定恩覆兆民乃刊祀典辨于羣神因瀆祭地嶽以配

天世主遵循永享歷年赤銳煌煌受茲介福京夏密清殊俗賓服令問不違可謂至德德音孔昭實惟我后出自中興大漢之舅本枝惟百延慶長久俾守西嶽達奉神祀改傳飾廟靈有攸齊降瑞畀祥景風凱悌惟風及雨成我稷黍橋民用章建乂室宇刊銘記誦克配梁甫

張昶西嶽華山堂闕碑銘

易曰天地定位山澤通氣然山莫尊於嶽莫盛於瀆山嶽有五而華居其一瀆有四而河在其數其靈也至矣聖人廢興必有其應故岱山石立中宗繼統太華授璧秦胡絕緒白魚入舟姬武建業寶珪出水子朝喪位布五方則處其西列三條則居其中若廣袤奇蟲山經有紀矣是以帝王巡狩親五嶽而告至覲方后而考禮故經有望秩之禋典有生殖之祀蓋所以崇山川而報功也四海一統天子

秉其禮諸侯立政彊國攝其祭奉其邑曰華陰也久矣乃紀於禹貢而分秦晉之境奉鄆晉之西則曰陰晉邊秦之東則曰寧秦邑旣遷徙禮亦如之二國力爭以奉以祭其城險固基趾猶存故老之言未殞於民也逮至大漢受命克亂不愆不忘舊名是復率禮不越故祀是尊厯葉增修虔恭又備一禱三祀終歲而四以迄于今而世宗又經集靈之宮於其下想喬松之疇是遊是憩郡國方士自遠而至者充巖塞崖鄉邑巫覡宗祀乎其中者盈谷溢谿咸有浮飄之志愉悅之色必雲霄之路可升而越果繁昌之福可降而致也故殖財之寶黃玉自出令德之珍卿相是毓匪惟嵩高降生申甫此亦有焉天有所興必先廢之故殷宗周宣以衰致盛是時也王業中缺大化陵遲郡縣旣毀財匱禮乏庭朝傾壞壇場蕪穢祭祀之禮有缺焉於是鎮

遠將軍領其地太守闕鄉亭侯段君諱煨字忠明自武威  
占此土憑託河華二靈是與故能以昭烈之德享上將之  
尊銜命持重屯斯寄國討叛柔服威懷是示羣凶旣除郡  
縣集寧家給人足戶有樂生之歡朝釋西顧之慮而懷關  
中之恃雖昔蕭相輔佐之功功冠羣后弗以加也遂解甲  
休士陣而不戰以逸其力修飾享廟壇場之位荒而復辟  
禮廢而復興又造祠堂表以參闕建神路之端首觀壯麗  
乎孔徹然后旅祀祈請旣有常處雖雨雪衣而禮不廢於  
是邑之士女咸曰宜之乃建碑刻石垂示後裔其辭曰於  
穆堂闕堂闕昭明經之營之不日而成匪奢匪儉惟德是  
程匪豐匪約惟禮是榮虔恭禋祀黍稷芬香神具醉止降  
福穰穰

王延壽桐柏廟碑

延熹六年正月八日乙酉南陽太守中山盧奴張君處正  
好禮尊神敬祀以淮出平氏始於大復潛行地中見於陽  
口立廟桐柏春秋宗奉災異告譴水旱請求位比諸侯聖  
漢所尊受珪上帝太常定甲郡守奉祀務潔沈祭從郭君  
以來二十餘年不復身到遣行承事簡畧不敬明神弗歆  
災害以生五嶽四瀆與天合德仲尼慎祭常若神在君準  
則大聖親之桐柏奉見廟祠崎嶇逼狹開拓神門立闕四  
達增廣壇場飾治華蓋高大殿宇穹齊傳館石獸表道靈  
龜十四衢延宏敞宮廟高峻祇愼慶祀一年再至躬進牲  
銓執玉以沈爲民祈福靈祇報祐天地清和異祥昭格禽  
獸碩茂草木芬芳黎庶預社民用作頌其辭曰  
汭汭淮源聖禹所導湯湯其逝惟海是造疏穢濟遠柔順  
其道弱而能強仁而能武聖賢立式明哲所取定爲四瀆

與河合矩烈烈明府好古之則虔恭禮祀不愆其德惟前  
廢弛匪恭匪力災眚以興陰陽以忒陟彼高岡臻茲廟側  
肅肅其敬靈祇降福雍雍其和民用悅服穰穰其慶年穀  
豐植望君輿駕扶老攜集慕君塵軌奔走忘食懷君惠貺  
思君罔極于胥樂兮傳於萬億

漢成陽靈臺碑

惟帝堯母昔者慶都兆含穹精氏姓曰伊體蘭石之操履  
規矩之度則乾𠄎之象通三光之曜游觀河濱感赤龍交  
如生堯厥後堯求祖統慶都告以河龍堯歷三河有龍授  
圖躬行聖政以育苗萌火陽之盛先閭後明遂以侯伯述  
踐帝宮慶都僊歿蓋葬于茲欲人莫知名曰靈臺上立黃  
屋堯所奉祠下營以水神龍所烹靈龜隱刑汾涌波流比  
目鯨魚懼鱗通泉元礫菟蘆生莛臺涯貫長歷久崇如□



口三代改易荒廢不修五運精還漢受濡期興威繼絕如  
堯爲之承祠基年鯢魚復生故有靈臺嗇夫魚隄衛仕驛  
憲鯢魚服之莛壽口口之隙道小衰沮遂遭亡新禮祠絕  
矣於是故廷尉仲定深惟大漢隆盛德被四表大平未至  
靈瑞未下四夷數侵軍甲數擾匪皇攸居日祲不夏案經  
考典河洛祕奧漢感赤龍堯之苗胄當修堯祠追遠復舊  
復治黃屋推原聖意災生變見天以譴告前後奏上陳敘  
大義招祥塞咎爲漢來祚朝廷克省帝納其謀歲以春秋  
奉大牢祠時廷尉选位連自表奏詔莢嘉命遂見聽口口  
爲大中大夫歸治黃塋令月吉日圖立規塋興業會工厥  
處夷平上合天意下應口口口口口口口口口口口口口口  
天戶嚮少陽前設大塋俟神之堂地致石墀其下清涼可  
舞八口以口大章時濟陰太守魏郡審晃成陽令博陵荀

遵各道大掾輔助仲君經之營之不日成之神靈精氣依  
怙於人廢之則亡存之則神復帥羣宗貧富相均共慕市  
碑著立功訓口勒石銘中門之表卜擇元日齊革精誠先  
薦毛血謹慎犧牲祈祠獲福神享其靈甘雨時降百穀孰  
成幽荒率服徐方來庭萬國蒙祉黎元賴榮莫不被德咸  
歌頌聲其辭曰

於赫慶都德墾大兮承神精耀統赤裔兮爰生聖堯名蓋  
世兮上受苻命迄帝制兮廣被之恩流荒外兮厯紀盈千  
垂遺愛兮陵廟復崇享大祭兮上來多怙降福沛兮萬國  
禱寧孰不賴兮光宣美勛永口幣兮垂視罔極億萬歲兮  
濟陰太守魏郡陰安審君諱晃字元讓從公車令來成陽  
令博陵蠡吾菅君諱遵字君臺從東明門司馬來丞潁川  
新汲尹茂字伯舉遷下邳尉尉潁川襄城楊調字君舉仲

新伯海從右中郎將遷鉅鹿太守仲球伯儀從太尉掾遷  
呂長仲選孟高辟司徒府遷徙不絕皆興治大聖黃屋之  
力

蔡伯喈陳留索昏庫上里社碑

佳在無飾辭

社祀之建尙矣昔在聖帝有五行之官而共工子勾龍爲  
后土及其末也遂爲社祀故曰社者土地之主也周禮建  
爲社位左宗廟右社稷戎醜攸行於是受脤土膏恒動于  
是祈農又頒之于兆民春秋之中命之供祠故自有國至  
于黎庶莫不祀焉惟斯庫里古陽武之戶牖鄉也春秋時  
有子華爲秦相漢興陳平由此社宰遂佐高帝克定天下  
爲右丞相封曲逆侯永平之世虞延爲太尉司空封公至  
嘉平延弟曾孫放字子卿爲尙書令外戚梁冀乘寵作亂

首策誅之王室以績封召都亭侯太僕太常司空毗天子而維四方克措其功往烈有常于是司監爰暨邦人僉以爲宰相繼踵咸出斯里秦一漢三而虞氏世焉雖有積善之慶修身之致亦斯社之所相也乃相與樹碑作頌以示後昆云

唯王建祀明事百神乃顧斯社于我兆民明德惟馨其慶聿彰自嬴及漢四輔代昌爰我虞宗乃世重光元勲旣立錫茲土疆乃公乃侯帝載用康神人協祚且巨且長凡我里人盡受嘉祥刊銘金石永世不忘

王仲宣荊州文學記

有漢荊州牧劉君稽古若時將紹厥績乃曰先王之爲世也則象天地軌儀憲極設教導化敘經志業用建雍泮焉立師保焉作爲禮樂以作其性表陳載籍以持其德上知

所以臨下下知所以事上官不失守民聽無悖然後大階  
平焉夫文學也者人倫之守大教之本也乃命五業從事  
朱衷所作文學延朋徒焉宣德音以贊之降嘉禮以勸之  
五載之間道化大行者德故老綦母閭等負書荷器自遠  
而至者三百有餘人於是童幼猛進武人革面總角佩觿  
委介免胄比肩繼踵川遊泉涌疊疊如也兢兢如也遂訓  
六經講禮物諧八音協律呂修紀歷理刑法六路咸秩百  
氏備矣

天降純嘏有所底授臻於我君受命既茂南牧是建荆衡  
作守時邁淳德宣其丕繇厥繇伊何四國交阻乃赫斯威  
爰整其旅虔夷不若屢戡寇侮誕啟洪軌敦崇聖緒典墳  
既章禮樂咸舉濟濟縉紳盛茲階宇祁祁髦俊亦集爰處  
和化普暢休徵時敘品物宣育百穀繁蕪勲格皇穹聲被

四字

聞人牟準魏敬侯碑陰文

敬侯所葬之先域城惟解梁地卽鄒首山對靈足谷當猗  
口勢高而趣幽形垣而背阜鑿室而可以蔽藏不墳而所  
冀速朽珍琦素白而靡尙衣服隨時而則有故吏述德於  
隧前門生紀言於碑後曰季居亭而已治詹嘉在主而可  
友處高攄之厚地將种億而永久所著述注解故訓及文  
筆等甚多皆已失墜所注孝經固而倉頡冢碑大篆書在  
左馮翊利陽亭南道旁及華山下亭碑增算狀殷叔時碑  
魏大饗碑羣臣上尊號奏及受禪石表文並在許繁昌尊  
號奏鍾元常書受禪表頌並金針八分書也太祖文帝等  
臨詔令雜駁議上封事一百餘條誠子等散在人間及碑  
石可見樹碑人郡國縣道姓名具如于後

晉造戾陵遏記

魏使持節都督河北道諸軍事征北將軍建城鄉侯沛國  
劉靖字文恭登梁山以觀源流相潔水以度形勢嘉武安  
之通渠羨秦氏之殷富乃使帳下督丁鴻軍士千人以嘉  
平二年立遏於水導高梁河造戾陵遏開車箱渠其遏表  
云高梁河者出自并州潞河之別源也長岸峻固直截中  
流積石籠以爲主遏高一丈東西長三十十當爲百丈南北廣  
七十餘步依北岸立水門門廣四丈立水十丈山水暴發  
則乘遏東下平流守常則自門北入灌田歲二千頃凡所  
封地百餘萬畝至景元三年辛酉詔書以民食轉廣陸廢  
不贍遣謁者樊晨更制水門限田千頃刻地四千三百一  
十六頃出給郡縣改定田五千九百三十頃水流乘車箱  
渠自薊西北逕昌平東盡漁陽潞縣凡所潤含四五百里

所灌田萬有餘頃高下孔齊原隰底平疏之斯漑決之斯  
散導渠口以爲濤門灑淝池以爲甘澤施加于當時敷被  
于後世晉元康四年君少子驍騎將軍平鄉侯宏受命使  
持節監幽州諸軍事領護烏丸校尉寧朔將軍遏立積三  
十六載至五年夏六月洪水暴出毀損四分之三剩北岸  
七十餘丈上渠車箱所在漫溢追惟前立遏之勲親臨山  
川指授規略命司馬關內侯逢惲內外將士二千人起長  
岸立石渠修主遏治水門門廣四丈立水五尺興復載利  
通塞之宜準遵舊制凡用功四萬有餘焉諸部王侯不召  
而自至繼負而趨事者蓋數千人詩載經始勿亟易稱民  
忘其勞斯之謂乎于是二府文武之士感秦國思鄭渠之  
績魏人置豹祀之義乃遐慕仁政追述成功元康五年十  
月十一日刊石立表以紀勲烈并記遏制度永爲後式焉



王簡棲頭陀寺碑

蓋聞挹朝夕之池者無以測其淺深仰蒼蒼之色者不足知其遠近况視聽之外若存若亡心行之表不生不滅者哉是以掩室摩竭用啟息言之津杜口毗邪以通得意之路然語彝倫者必求宗於九疇談陰陽者亦研幾於六位是故三才既辨識妙物之功萬象已陳悟太極之致言之不可以己其在茲乎然爰繫所筌窮於此域則稱謂所絕形乎彼岸矣彼岸者引之於有則高謝四流推之於無則俯宏六度名言不得其性相隨迎不見其終始不可以學地知不可以意生及其涅槃之蘊也夫幽谷無私有至斯響洪鐘虛受無來不應况法身圓對規矩冥立一音稱物官商潛運是以如來利見迦維託生王室憑五行之軼擢溺逝川開八正之門大庇交喪於是元關幽鍵感而遂適

遙源滂波酌而不竭行不捨之檀而施冷羣有唱無緣之  
慈而澤周萬物演勿照之明而鑒窮沙界導亡機之權而  
功濟塵劫時義遠矣能事畢矣然後拂衣雙樹脫屣金沙  
惟恍惟惚不曠不昧莫繫於去來復歸於無物因斯而談  
則棲遑大千無爲之寂不撓焚燎堅林不盡之靈無歇大  
矣哉正法旣沒象教陵夷穿鑿異端者以違方爲得一順  
非辯僞者比微言於目論於是馬鳴幽讚龍樹虛求並振  
顏綱俱維絕紐蔭法雲於真際則火宅晨涼曜慧日於康  
衢則重昏夜曉故能使三十七品有樽俎之師九十六種  
無藩籬之固旣而方廣東被教肄南移周魯二莊親昭夜  
景之鑒漢晉兩明並勒丹青之飾然後遺文間出列刹相  
望澄什結轍於山西林遠肩隨乎江左矣頭陀寺者沙門  
釋慧宗之所立也南則大川浩汗雲霞之所沃蕩北則層

峰削成日月之所迴薄西眺城邑百雉紆餘東望平臯千里超忽信楚都之勝地也宗法師行潔珪璧擁錫來游以爲宅生者緣業空則緣廢存軀者惑理勝則惑亡遂欲捨百齡於中身殉肌膚於猛鷲班荆蔭松者久之宋大明五年始立方丈茅茨以庇經象後軍長史江夏內史會稽孔府君諱覬爲之薙草開林治經行之室安西將軍郢州刺史江安伯濟陽蔡使君諱興宗復爲崇基表剎立禪誦之堂焉以法師景行大迦葉故以頭陀爲稱首後有僧勤法師貞節苦心求仁養志纂修堂宇未就而沒高軌難追藏舟易遠僧徒聞其無人懷椽毀而莫構可爲長太息矣惟齊繼五帝洪名紐三王絕業祖武宗文之德昭升嚴配格天光表之功宏啟興復是以惟新舊物康濟多難步中雅頌驟合韶濩炎區九譯沙塲一候粵在於建武焉乃詔西

中郎將郢州刺史江夏王觀政藩維樹風江漢擇方城之  
令典酌龜蒙之故實政肅刑清於是乎在寧遠將軍長史  
江夏內史行事彭城劉府君諱誼智刃所遊日新月故道  
勝之韻虛往實歸以此奇業廢於已安功墜於幾立慨深  
覆賁悲同棄井因百姓之有餘間天下之無事庀徒揆日  
各有司存於是民以悅來工以心競亘邱被陵因高就遠  
層軒延袤上出雲霓飛閣逶迤下臨無地夕露爲珠網朝  
霞爲丹牖九衢之草千計四照之花萬品崖谷共清風泉  
相渙金姿寶相永藉閒安息心了義終焉游集法師釋曇  
珍業行淳修理懷淵遠今屈知寺任永奉神居夫民勞事  
功旣鏤文於鐘鼎言時稱伐亦樹碑於宗廟世彌積而功  
宣身愈遠而名劭敢寓言於彫篆庶髣髴乎衆妙辭曰  
質判元黃氣分清濁涉器千名含靈萬族淳源上派澆風

下黷愛流成海情塵爲岳皇矣能仁撫期命世乃瞻中土  
聿來迦衛奄有大千遂荒三界殷鑒四門幽求六歲亦旣  
成德妙盡無爲帝獻方石天開淥池祥河輟水寶樹低枝  
通莊九折安步三危川靜波澄龍翔雲起耆山廣運給園  
多士金粟來儀文殊戾止應乾動寂順民終始法本不然  
今則無滅象正雖闢希夷未缺於昭有齊式揚洪烈釋網  
更維元津重世惟此名區禪慧攸託倚據崇巖臨睨通壑  
溝池湘漢堆阜衡霍膺膺亭臯幽幽林薄媚茲邦后法流  
是挹氣茂三明情超六八脊懷靈宇載懷興葺丹刻輦飛  
輪奐離立象設旣闢辟容已安桂深冬煥松疎夏寒神足  
游息靈心往還勝幡西振貞石南刊

沈休文桐柏山金庭館碑銘

夫生靈爲貴有識斯同道天云及終天莫反故仙學之秘

上聖攸尊啟玉笈之幽文貽金壇之妙訣駐景濛谷還光  
上枝吐吸烟霞變煉丹液出沒無方升降自己下樓洞室  
上賓羣帝覩靈岳之驟啟見滄波之屢竭望元洲而駿驅  
指蓬山而永驚芝蓋三重駕螭龍之蜿蜒雲車萬乘載旗  
帥之逶迤此蓋棲靈五嶽未暨夫三清者也若夫上元奧  
遠言象斯絕金簡玉字之書元霜絳雪之寶俗士所不能  
窺學徒不敢輕慕且禁示嚴重志業艱劬自非天稟上才  
未易可擬自惟凡劣識鑒鮮方徒抱出俗之願而無致遠  
之力卑尚幽棲屏棄情累留愛巖壑託分魚鳥塗愈遠而  
靡倦年既老而不衰高宗明皇帝以上聖之德結宗元之  
念忘其菲薄曲賜提引來自夏汭固乞還山權憩汝南縣  
境固非息心之地聖主纘歷復蒙繫維永泰元年方遂初  
願遂遠出天台定居茲嶺所憩之山實惟桐柏實靈聖之

下都五縣之餘地仰出星河上參倒景高崖萬沓遼澗千  
迴因高建壇憑巖考室飾降神之宇置朝禮之地桐柏所  
在厥號金庭事曷靈圖因以名館聖上曲降幽情留信彌  
密置道士十人用祈嘉祉越以不才首膺斯任永棄人羣  
竄景窮麓結懇志於元都望霜谷於雲路仰宣國靈介茲  
景福延吉祥於清廟納萬壽於神躬又願道無不懷澤無  
不至幽荒屈膝戎貊稽顙息鼓輟烽守在海外因此自勉  
兼遂微誠日久勤劬自強不已翹心屬念晚臥晨興餐正  
陽於亭午念孔神於中夜將三芝而延佇飛九丹而宴息  
乘鳧輕舉留舄忘歸以茲丹穀表之元極無曰在上日鑒  
非遠銘石靈館以旌厥心其辭曰

道無不在若存若亡於惟上學理妙羣方用之日損言則  
非常儵焉靈化羽衣霓裳九重嶢峴主山璀璨日爲車馬

芝成宮觀虹旌拂月龍輶漸漢萬春方華千齡始旦伊余  
菲薄竊慕隱淪尋師講道結友問津東採震澤西遊漢濱  
依稀靈眷髣髴幽人帝明紹歷惟皇纂位屬心鼎湖脫屣  
神器降命凡底仰祈靈秘瞻彼高山興言覆簣啟基桐柏  
厥號金庭喬峰迴峭擘漢分星臨雲置墀駕岳開櫺闥塗  
蹇產林麓蔥青誰謂應遠神道微密慶集宮闈祥流罕畢  
其久如地其恒如日壽同南山與天無則更生變戀外示  
無功少君飛轉密與神通因資假力輕舉騰空庶憑嘉誘  
永濟微躬

梁簡文帝招真館碑

夫東瀛淶水三變成田西嶽靈桃千年未子尙以星起牽  
牛部首迢遞律生甲子氣數杳冥况復上遊玉清損之又  
損高排金闕元之又元豈言象之能詮非時節之所辨海



虞縣者則虞農都尉太康置其宰境有虞山越絕書云巫咸之所出也高巖鬱起帶青雲而作峰瀑水懸流雜天河而俱灑雖日門採藥之地楚望懷椒之歌湯反流沙之魂錦飾汾陰之鼎無以喻焉其峰則有石城石門虛峴自然不度句吳之馬神功挺起豈似岡陵之畫魏后冰城夜陣權息長安慈石浴鐵暫流較跡比期優劣斯遠道士沛郡張君諱道裕字宏真卽漢朝天師陵十二代孫天監二年來至此岫棲遁十有餘載夜忽夢見聖祖云峰下之地面勢閒寂宜立館宇可以卜居裕師潘洪隱始寧四明山無何有人耳長髮短云從虞山招真治來言訖忽然不見潘馳信報君君因辭山舊居而以夢中所指峰下之地卽以爲治故號招真高堂迴立有類玉臺之山長廊宛轉還如步廊之岫柱削芳桂豈俟開陽木飛材選海檀無勞豫章

神拔黃庭司命之府有類玲瓏米陵赤石之觀同符宏敞  
遠望仲雍而高墳蕭瑟旁臨齊女則衰壠蒼茫蘚尋千仞  
之木氣叶星晷華飛五香之草形圖宮室帷葉綵花卷舒  
蹊逕陽桃侯棗榮落巖崖樹息金烏簷依銀鳥鳳將九子  
應吹能歌鶴生七歲逐節成舞旭日晨臨同迎若華之色  
夕陽斜影俱成拂鏡之暉玉礎微潤應山雲於高牖鳴籟  
徐響引和風於空谷方當專氣致柔入無爲之境周行不  
殆窮混成之致茅子算歸轅轡無已魏姬宴罷留駕不還  
何止持節變淮南之金傳符蒔北鐘之稻明月蛟龍之騎  
驅之使鬪四銖七子之鏡引以成刀散季齋之羽起雄鳴  
之霧而已哉乃爲銘曰

玉龜二始金書八會道淡地心功浮天外故帝可小唯真  
能大德起同塵善生塞兌物寶自然人符交泰掩映綠蘿

馬二十一  
三  
穹隆紫蓋仙治之美此焉爲最雄柱千步陽臺百丈水均  
下矚山踰高掌野寂雲興禽繁山響升虹莫棲豐雷朝上  
元陽作石竹龍成杖書藏玉匣藥蘊銀筒燒鉛雜鯉折桂  
和葱羽衣可服雲輶易通斧柯雖朽碑石無窮

梁簡文帝吳郡石像碑

蓋聞軒后之圖載浮河洛秦王之璧更涌滄溟昭覃之洲  
乘清源而西泛蓬萊之岫□□流而南徙况夫道由慈善  
應起靈覺是以無方之迹隨機示現無緣之力因物成感  
晉建興元年癸酉之歲吳郡婁縣界淞江之下號曰滬瀆  
此處有居人以漁爲業掛此詹綸無甄小鮓布斯九戢常  
待六鼇遙望海中若二人象朝視沈浮疑諸蜃氣夕復顯  
晦乍若潛火于是謂爲海神卽與巫祝同往祈候七盤圓  
鼓先奏盛唐之歌百味椒漿屢上東皇之曲遂乃風波駭

吐光景晦明咸起渡河之悲竊有覆舟之懼相顧失色于斯而返又有受持黃老好尙神仙職在三洞身帶八景更竭丹欸復其奉迎尊像沈軀沒而不見經歷旬日遐邇普聞吳縣華里朱膺清信士也獨謂大覺大慈將宏化迹乃沐浴清齋要請同志與東靈寺帛尼及胡伎數十人乘船至瀝瀆口頂禮歸依歌唄贊德于時微風送棹淑景浮波雲舒葢而未移浪開花而不噴雖舟子招招弗能遠驚而靈相峩峩漸來就浦仰觀神像嶷然雙泛非因鵲首詎假龍橋豈藉銀連寧須玉軸背各有題一名維衛一名迦葉于是時衆踊躍得未曾有復懼金仙之姿非凡所徒試就提擇豁爾勝舟指燕宮而西歸望葑門而一息道俗側塞人祇協慶膺家住近通元寺迺孫權爲乳母陳氏之所立也亦一邦之勝地胥山之神塔乃遷像于此寺武夫數百

咸不能勝其怪曰朱膺帛尼二人之力而能捧持不覺爲異今人工甚盛確乎不移此必精誠弗能致也乃復竭心同時稽顙然後乃動至自舟中故知據井夜飛實無以異石不能重有覺憑焉後有外國沙門釋法開來稱彼國衆聖所記云東方有二石像及阿育王塔若能恭往禮觀滅無量罪免離三塗禮已而去中大通四年歲在壬子臨口汝靈侯奉勅更造銅光二枚其一高九尺其一高八尺五寸銅邁丹陽耻論劉向之術區選攻金無俟嵇康之鍛旣鑄旣鍤是磨是銑晔如光定湛似日輪亦當遠照三千普瞻色像遙觀十方俱聞說法豈止惜命小鳥欣入影中重罪衆生還逢愛日而已哉吳郡僧正慧法師深修五定淨持七支于三寶中盡力宏護立摩尼之勝殿製飛行之寶塔至于莊嚴妙色實有厥徵夫魯聖云亡尙追儀于有若

楚臣殞世亦託似于優孟放勲之后更圖長樂之畫交命  
之君不口稽命之禋或傳諸往牘或布在前司或贊述盈  
耳或壽宮虛置况遠追應身近規靈迹不銘不勒何以稱  
揚乃爲銘曰

巍巍天象堂堂最勝慧日獨圓無生永證愍此魚釣傷茲  
螺孕乍動慈舟時延寶乘留住待緣獨有傳應傳應伊何  
寶茲靈像履冰晨遊淩濤夜上七衆有憑九垓咸仰照此  
真容開斯俗網千輪足起萬字留書身橫五分衣刻三銖  
嗟爾末俗心王所驅顙浮水沫命役馳駒宜宏希嚮必盡  
勤勛觀相塵滅聞聲惑祛湛然神跡長處全吳

梁元帝荊州放生亭碑

魚從流水本在桃花之源龍處大林恒捻浮雲之路豈謂  
陵陽垂釣失雲失水莊子懸竿吞鈎吞餌雖復元龜夜夢

終見取於宋王朱鷺晨飛尙張羅於漢后譬如黃雀伺蟬  
不知隨彈應至青鸛逐兔詎識杠鼎方前北海之餐鶚鵠  
未始非人西王之使傳信誰云賤鳥故知魚鳥一觀俱在  
好生欲使金牀之雁更反衡陽之侶雪山之鹿不充食萍  
之宴

梁元帝皇太子講學碑

皇太子游雷種德重離作兩業冠孟侯道高上嗣宮牆累  
仞高山仰止承華之閣更似通德之門博望之園反類華  
陰之市家丞庶子並入四科洗馬後車俱通六學轉金路  
而下辟雍晬玉裕而經槐市詳其懸鏡高堂衛尊待酌瞻  
後忽前博文約禮將東極長男之宮不獨銘于銀榜南皮  
太子之序豈徒擅于金碑

徐孝穆司空徐州刺史侯安都德政碑

巖巖天柱大矣周山之峰桓桓地軸壯哉崑崙之阜三光  
懸而不墜九土鎮以無疆承乾合德之君則天體元之后  
所以並咨四鎮咸建五臣業配蒼祇功成寓縣至於流名  
雅頌著美風詩年代悠然寂寥無紀其能繼茲歌詠者司  
空侯使君乎自文昭武穆祚土開家濮水盛其衣簪榮波  
分其緒秩仁義之道夷門美於大梁儒雅之風司徒重于  
強漢自通人許邵託命于江湖高士袁忠寄身于交越俱  
遠建安之難獨處衡山之陽祖天資秀傑世載雄豪卓富  
擬于公侯班倂必于旌鼓父光祿大夫邑里開通德之門  
州鄉無抗禮之客自茫茫禹迹赫赫宗周家滅驪戎國亡  
夷羿我高祖武皇帝迎河圖于浪泊拈地象于炎州南興  
涿鹿之師北問共工之罪天生宰輔堯年致白虎之祥神  
賜英年殷帝感蒼龍之傑公亦觀時佇聖嘯咤風雲跪開



黃石之書高詠元池之野沈吟梁甫自比管仲之才惆悵  
莘郊久負伊生之歎自羯虜侵華羣蠻縱軼後臯桂部之  
地四戰五達之郊郡境賢豪將謀禦難長者僉論推公主  
盟義士雄民星羅霧集公旣膺五聘方啟六韜率是驍徒  
仍開嶺嶠自大討瀟湘同茲樊鄴下軍違命上策不宣敗  
我王師受拘勅盜大陳格於文祖咸秩具神率土依風羣  
靈稟朔公亦忠爲令德天纂之謀吳帳斯開衛風無擁雖  
復季孫還魯隨武濟河國慶民歡相儔匪若卽授使持節  
開府儀同三司丹陽尹昔光武不尤於馮異穆公深禮於  
孟明終報王官之師遂舉咸陽之地斯乃聖主之宏畧而  
名臣之遠圖者焉皇帝以陶唐啟國致玉版于河宗顓頊  
承家佐金天于江水經綸草昧定鼎之業居多締構權輿  
斷鼇之功相半固以英聲馳于海外信義感于寰中主器

攸歸當璧斯在公于是抗表長信清宮未央從億兆以同  
心引公卿而定策馳輕軒於軫轡奉待駕於中都七廟之  
基于焉永固萬邦之本由此克寧乃復進司空公南徐州  
刺史于是鎮之以清靜安之以惠和望杏敦耕瞻蒲勸穡  
室歌千耦家喜萬鍾陌上成陰桑中可詠春鴈始嘯必具  
籠筐秋蟀載吟競鳴機杼或肅拜靈祀躬瞻舞雩去駕擁  
於風塵還旌阻於飄沐京坻歲積非勞楚堰之泉倉廩年  
豐無用秦渠之水雖復東過小縣夏雨遂其輕輪南渡滄  
江秋濤弭其張蓋固不得同年而語矣若夫聽採民訟昏  
曉必通召引軒櫺躬親辨決立授符於前案無留詣於後  
曹接務高城之中非異甘棠之下欣欣美俗濟濟都塵以  
賈琮郭賀之風行建武永平之化於是州民散騎常侍王  
瑒等拜表宮闕請揚茲美化樹彼高碑民欲天從允彰絲

詰銘曰

鬱鬱三象茫茫九州綿天慘沴浹地虔劉赫矣高祖爰清  
國讐元勲佐命力牧風后亦旣旋歸邦家有暉宮亭蠡浦  
奮翅高飛電捲勅寇風行國威文身被髮作貢來綏我皇  
纂武攀號東序謁渭同周迎門惟呂流矢爲暴攬槍斯舉  
喋喋蒼黎危危刀俎自我徂征妖氛克平爰驅大義實翦  
長鯨北震巢浦南俘灌城青羌卷介赤狄迴兵蹈舞難踰  
歌謠靡宣曰我黎庶俱祈上元山移兩越海變三田公爲  
上相復倍斯年

徐孝穆晉陵太守王勵德政碑

若夫睢陵世傳已詳載德之華徐州先賢亦著清風之美  
偉哉文獻光啟中興郭莖表其深源何籌慙其遠慶豈惟  
桓氏之鳴玉張家之珥貂袁姓之朱衣揚宗之華轂又有

侯飛遮列班弓夾門濯龍俯望緹騎盈道奕世如此何其  
盛哉君以藍田美玉大海明珠灼灼美其聲芳英英照其  
符彩丰神雅淡識量寬和既有崔琰之鬚眉非無鄭元之  
腰帶爛爛如高巖下電騷騷若長松裏風勢利無擾于胸  
襟行藏不槩于懷抱家門雍睦孝友爲風上友不諂下交  
不瀆脫貂救厄情靡矜吝釋馬窮途唯濟危殆至于網羅  
圖籍脂粉藝文學侶挹其精微詞宗稱其妙絕出爲仁武  
將軍晉陵太守五雞三毓動息有方問羊知馬鉤鉅兼設  
濟北移樹累政之所未治汝南爭水連年之所無斷一朝  
明決曾不留滯四民商販咸用殷阜銘曰

康哉寶運美矣良臣渭自澧水源于洛濱公侯世及宰輔  
相因曰我民秀山川降神風情穆穆孝友恂恂學則經笥  
文爲世珍高風遠矣曠代難倫鼎鉉虛職台階未臻安知

霜霰遽天松椿碣石斯表民情旣陳徒然下拜何報陽春

合河蕭氏  
附梓家譜

駢體文鈔卷二十四

墓碑類

蔡伯喈胡公碑銘

表墓之文中郎爲正宗凡可爲規範者皆在所錄

公諱廣字伯始南郡華容人也其先自媯姓建國南土曰  
胡子春秋書焉列于諸侯公其後也考以德行純懿官至  
交趾都尉公寬裕仁愛覆載博大研道知幾窮理盡性凡  
聖哲之遺教文武之未墜罔有不綜年二十七察孝廉除  
郎中尙書侍郎左丞尙書僕射內正機衡允釐其職文敏  
暢乎庶事密靜周乎樞機帝用嘉之遷濟陰太守公乃布  
愷悌宣柔嘉通神化導靈和揚惠風以養真激清流以盡  
邪取忠肅於不言消奸宄於爪牙是以君子勤禮小人知  
恥鞠推恩於官曹刑戮廢於朝市餘貨委於路衢餘種棲  
于畝畝遷汝南太守增修前業考績旣明入作司農實寧

金穀之淵藪和均關石王府以充遂作司徒昭敷五教進  
作太尉宣暢渾元人倫輯睦日月重光遭國不造帝祚無  
主援立孝桓以紹宗緒用首謀定策封安樂鄉侯戶邑之  
數加于羣公入錄機事聽納總已致位就第復拜司空敷  
土導川俾順其性功遂身退告疾固辭乃爲特進爰以休  
息又拜太常典司三禮敬恭禋祀神明嘉歆永世豐年聿  
懷多福復拜太尉尋申前業又以特進逍遙致位又拜太  
常邁疾不夷遜位歸爵遷於舊都徵拜太中大夫延和末  
年聖主革正幸臣誅斃引公爲尙書令以二千石居官委  
以閭外之事釐改度量以新國家宏綱旣整袞闕以補乃  
拜太僕車正馬閑六駟習馴遷太常司徒成宗晏駕推建  
聖嗣復封故邑與叅機密寢疾告退復拜太傅錄尙書事  
于時春秋高矣繼親在堂朝夕定省不違子道勿無几杖

言不稱老居喪致哀率禮不越其接下答賓雖幼賤降等  
禮從謙厚尊而彌恭勞思萬機身勤心苦雖老萊子嬰兒  
其服方叔克壯其猷公且納于台屋正考父俯而循禮曷  
以尙茲夫蒸蒸至孝德本也體和履忠行極也博聞周覽  
上通也勤勞王家茂功也用能十登三事篤受介祉亮皇  
業於六王嘉丕績於九有躬生人之光寵享黃耇之遐紀  
蹈明德以保身與福祿乎終始年八十有二建寧五年春  
壬戌薨于位天子悼痛贈策賜諡曰文恭如前傳之儀  
而有加焉禮也故更司徒許詡等相與欽慕崧高蒸蒸民之  
作取言時計功之則論集行跡銘諸琬琰其詞曰伊漢元  
輔時惟文恭聰明睿哲思心瘁容畢力天機帝休其庸賦  
政于外有邈其蹤進作卿士粵登上公百揆時序五典克  
從萬邦黎獻其唯時雍勳烈旣建爵土乃封七被三事再



作特進宏唯幼冲作傳以訓赫赫猗公邦家之鎮澤被華  
夏遺愛不淪日與月與齊光並運存榮亾顯沒而不泯  
蔡伯喈太傳文恭侯胡公碑

公諱廣字伯始交趾都尉之元子也公應天淑靈履性貞  
固九德咸修百行畢備遭家不造童而夙孤上奉繼親下  
慈弱弟崎嶇儉約之中以盡孝友之道及至入學從訓歷  
觀古今生而知之聞一視十兼以周覽六經博總羣議旁  
貫憲法通識國典年二十七察孝廉除郎中尚書侍郎尚  
書左丞尚書僕射幹練機事綢繆樞極忠亮唯允簡于帝  
心智略周密冠于庶事遷濟陰太守其爲政也寬裕足以  
容衆和柔足以安物剛毅足以威暴體仁足以勸俗故禁  
不用刑勸不用賞其下望之如日月從之如影響思不可  
忘度不可革遺愛結於人心超無窮而垂則微拜大司農

遂作司農遷太尉以援立之功封安樂鄉侯錄尚書事稱  
疾屢辭策賜就第復拜司空功成身退俾位特進又拜太  
尉復以特進致命休神又拜太尉遜位歸爵旋于舊土徵  
拜太中大夫尚書令太僕太常司徒永康之初以定策元  
功復拜前邑錄尚書事疾病就第又授太傅入參機衡五  
蹈九列七統三事諒闇之際三據冢宰和神人於宗伯理  
水土於下台訓五品於司徒耀三辰于上階光弼六世歷  
載三十自漢興以來鼎臣元輔耄耄老成勲被萬方與祿  
終始未有若公者焉春秋八十二建寧五年三月壬戌薨  
于位天子悼惜羣后傷懷詔五官中郎將任崇奉冊贈以  
太傅安樂鄉侯印綬拜室家子一人郎中賜東園祕器賜  
絲帛含斂之備中謁者董翽弔祠護喪錢布賻賜率禮有  
加賜諡曰文恭昭顯行迹四月丁酉葬于洛陽塋故吏濟

陰池喜感公之義率慕黃鳥之哀推尋雅意彷徨舊土休  
績丕烈宜宣于此乃樹石作頌用揚德音詞曰於皇上德  
懿鑠孔純大孝昭備思順履信膺期命世保茲舊門淵泉  
休茂彪炳其文爰贊天機翼翼唯恭夙夜出納紹跡虞龍  
賦政于外神化元通普被汝南越用熙雍帝曰休哉命公  
三事乃耀柔嘉式是百司股肱元首庶績咸治二氣燮雍  
五徵來備勳格皇天澤洽后土封建南藩受茲介祐玉藻  
在冕毳服艾輔輅車雕駟四牡修扈贊事上帝祇祀宗祖  
陟降盈虧與時消息既明且哲保身遺則同軌旦與光充  
區域生榮死哀流統罔極

蔡伯喈太傅胡公碑

維漢二十有一世建寧五年春三月既生魄八日壬戌太  
傅安樂鄉侯胡公薨越若來四月辛酉葬我君文恭侯於

是掾太原王允鴈門畢整屬扶風曾甫潁川殷歷等僉謂  
公之德也柔而不犯威而不猛文而不華實而不樸靜而  
不滯動而不躁總天地之中和覽生民之上操聰明膚敏  
兼質先覺涉觀憲法契闊文學睹臯陶之闡圖探孔子之  
房奧然而約之以禮守之以恭寬之以納衆汎愛多容其  
誘人也恂恂焉怡怡焉能使蒙惑開析僞戾優順逸惰勤  
信及其創基發跡機密聖朝其知其能夙夜惟寅以允帝  
命是以頻繁機極三升而不出焉乃還譚其舊章彌綸古  
訓貫萬品研精微用補前臣之所闕十年而無愆強記同  
乎富平周慎逸於博士偶山甫乎喉舌匹虞龍而納言唯  
帝命公以二郡其爲政也導人以德帥物以已敦以忠肅  
勵以知恥人悅其化天樂其和士相勉於公朝民勸行於  
私家微纒縈而靡係鞭撻棄而無加洋洋乎若德宣治嚴

以爲威寬以爲福而已哉五作卿士七蹈相位太僕司農  
太傅司空各一司徒特進各二太常太尉各三光輔六世  
歷載三十有餘其致治也通水泉於潤下蓄后土於稼穡  
訓五品於羣黎參人物於區域耀三辰於渾元協太中於  
皇極傳舊德於幼冲率旦奭於舊職譬彼四時功成則退  
在盈思冲升降以順建封域於南土踐殊號於特進榮祚  
統業垂乎來允公自二郡及登相位凡所辟用遂至大位  
者故司徒中山祝括其餘登堂閣據賦政策勲樹功流化  
者蓋不可勝載唯我末臣頑蔽無聞仰慕羣賢惡乎可及  
自公寢疾至於薨斃參與嘗禱列位喪位雖庶物戮力不  
愆于禮進睹墳塋几筵空設退顧堂廡音儀永闕感悼傷  
懷心肝若割相與累次德行撰舉功勲刊之于碑用慰哀  
思其詞曰煥文德伊朝后應期運作漢輔嘉中興膏民庶

澤洪淳亶攸序巨地區充天宇輳高達踵遐武揚景烈垂  
不朽仰邃古耀昆後

蔡伯喈楊公碑

公諱秉字叔節宏農華陰人其先蓋周武王之穆晉唐叔  
之後也末葉以支子食邑于楊因氏焉周室旣微裔胄無  
緒暨漢興烈祖楊喜佐命征伐封赤泉侯嗣子紫紱冕相  
繼公之丕考以忠憲亮弼輔孝安登司徒太尉公承夙緒  
世篤儒教以歐陽尚書京氏易誨授四方學者自遠而至  
蓋踰三千初辟司空舉高第拜侍御史遷豫州兖州刺史  
任城相徵入勸講拜太中大夫左中郎將尚書出補右扶  
風留拜光祿大夫遭權嬖貴盛六年守靜外戚火燔乃遷  
太僕太卿公事絀位浹辰之間俾位河南憤疾豪強見邁  
姦黨用嬰疾廢起家復拜太常遂陟三司沙汰虛冗料簡

貞實拙援表達與之同藹芳任鼎重從駕南巡爲朝碩德  
然知權過於寵私富侔國大臣苛察望變復還條表以聞  
啟導上怒其時所免州牧郡守五十餘人饕餮是黜英才  
是列善否有章京夏清肅在位七載年七十有四延熹八  
年五月丙戌薨朝廷惜焉寵賜有加公自奉嚴勅動遵禮  
度量材授任當官而行不爲義紕疾是苛政益固其守厨  
無宿肉器不鏤雕夙喪嬪儷妾不嬖御可謂立身無過之  
地正直清儉該備者矣昔仲尼嘗垂三戒而公免焉故能  
匡朝盡直獻可去奸忠佞前後聲塞宇宙非黃中純白窮  
達一致其惡能立功立事敷聞于下昭升于上若茲巍巍  
者乎於是門人學徒相與刊石樹碑表勒鴻勲讚懿德傳  
億年於戲公唯嶽靈天挺德翼至神氣絀縕仁哲生應台  
任作邦楨帝欽亮訪典刑道不惑迄有成光遐邇穆其清

蔡伯喈司空文烈侯楊公碑

曰漢有國師司空文烈侯楊公公唯司徒之孫太尉公之  
允子皇祖考以懿德胥及肄勤式建休勳啟洪範公祇服  
宏業克丕堂構小乃不敢不慎大亦不敢不戒用罔有擇  
言失行在于其躬泊在辟舉先志載言罔不攸該乃自宰  
臣以從王事立功不有用辭其祿逮作御史允執國憲納  
于侍中在帝左右爰董武事王師孔閑羣公以舊德碩儒  
道通術明宜建師保延入華光侍宴露寢敷典誥之精旨  
達聖王之聰獻帝以機密齊栗常伯劇任鮮克知臧以釐  
其采命公再作少府俾率其屬以熙庶績天地作險國家  
丕承軍門祛禁式遏寇虐命公再作光祿勳總其熊羆之  
士不貳心之臣保乂帝家巖巖大理惟制民命命公作廷  
尉惟刑之恤旁施四方惟明折獄蔽罪于憲之中亦惟三



禮六樂國之元幹命公作太常明德惟馨八音克諧神人以和永世豐年溥天率土而衆莫外命公作司空公唯戢之翊明其政時惟休哉惟天陰隲下民彝倫所由順序命公作司徒而敬敷五教以親百姓父義母慈兄友弟恭子孝時惟休哉昭教于辟雍命公作三老帝躬以祇敬遵有虞于上庠范范大運垂光烈曜命公作太尉璇璣運周七精循軌時惟休哉帝欲宣力于四方公則翼之辟道或違公則弼之虔恭夙夜不敢荒寧用對揚天子丕顯休命天子大簡其勲用授爵賜封侯于臨晉功成化洽景命有傾帝乃震慟執書以泣命于左中郎將郭儀作策賜公驃騎將軍臨晉侯印綬兼號特進諡以文烈寵命畢備而後卽世肆其孤彪敢儀古式昭銘景烈銘曰

天鑒有漢誕生元輔世作三事勲在王府乃及伊公克光

前矩悉心畢力允其祖武化洽羣心澤霑區宇帝曰文烈  
朕嘉君功爲邑河渭建茲土封申備九錫以祚其庸位此  
特進於異羣公昔在申呂匡佐周宣崧高作頌大雅揚言  
今我文烈帝載用熙參光日月比功四時身歿名存永世  
慕思

蔡伯喈漢太尉楊公碑

公諱賜字伯猷宏農華陰人姬姓之國有楊侯者公其後  
也其在漢室赤泉侯佐高丞相翼宣咸以盛德光于前朝  
祖司徒考太尉繼蹟率司咸有助烈公承家崇軌受天醇  
素欽承奉情閑于伐柯烈風維變不易其趣文藝典籍尋  
道入奧操清行朗潛晦幽閒不答州郡之命辟大將軍府  
不得已而應之遷陳倉令公乃因是行退居廬公車特徵  
以病辭司空舉高第拜侍中越騎校尉帝篤先業將問故

訓公以羣公之舉進授尚書于禁中遷少府光祿勳敬撰  
百事莫不時序庶尹知恤閭閻推清列作司空地平天成  
陰陽不忒公遂身避託疾告退又以光祿大夫受命司徒  
敬敷五品宣洽人倫燮和化理股肱耳目之任靡不克明  
及至太尉四時順動三光耀潤羣生豐遂太和交薄三作  
六卿五躋三階受爵開國應位特進非盛德休功假于天  
人孰能該備寵榮兼包令錫如公之至者乎公體資明哲  
長於知見凡所辟選升諸帝朝者莫非瑰才逸秀并參諸  
佐惟我下流二三小臣穢損清風愧于前人乃糾合同寮  
各述所審紀公勲績刊石立銘以慰永懷銘曰

天降純嘏篤生柔嘉俾允祖考光輔國家三業在服帝載  
用和粵暨我公尤執忠貞在棟伊隆于鼎斯寧德被宇宙  
華夏以清受茲介福履祚孔成爲邑河渭袞冕紱珽以佐

天子祇事三靈丕顯伊德萬邦作程爰銘爰贊式昭懿聲  
蔡伯喈朱公叔墳前石碑

維漢二十一世延熹六年粵四月丁巳忠文公益州太守  
朱君名穆字公叔卒于京師其五月丙申葬于宛邑北萬  
歲亭之陽舊兆域之南其孤野受顧命曰古者不崇墳不  
封墓祭服雖三年無不於寢今則易之吾不取也爾其無  
拘于俗無廢予誠野欽率遺意不敢有違封墳三板不起  
棟宇乃作祠堂于邑中南陽舊里備器鑄鼎銘功載德懼  
墳封彌久夷于平壤於是依德像緣雅則設茲方石鎮表  
靈域用慰其孤罔極之懷乃申詞曰

敬惟忠文時惟朱父實天生德丕承洪緒彌綸典術允迪  
聖矩好是貞厲疾彼強禦斷剛若仇柔亦不茹仍用明夷  
遭難受侮帝曰休哉朕嘉乃功命汝納言允汝祖蹤父拜

稽首翼翼惟恭篤裴不忘夙夜在公昊天不弔降茲殘殃  
不遺一父俾屏我皇我皇悼心錫詔孔傷位以益州贈之  
服章用刊彝器宣昭遺光子子孫孫永載寶藏

蔡伯喈陳太邱碑

先生諱寔字仲弓潁川許昌人也含元精之和應期運之  
數兼資九德總修百行於鄉黨則恂恂焉斌斌焉善誘善  
導仁而愛人使夫少長咸安懷之其爲道也用行舍藏進  
退可度不徼許以干時不遷貳以臨下四爲郡功曹五辟  
豫州六辟三府再辟大將軍宰問喜半歲太邱一年德務  
中庸教敦不肅政以禮成化行有謐會遭黨事禁錮二十  
年樂天知命澹然自逸交不諂上愛不驥下見幾而作不  
俟終日及文書赦宥時年已七十遂隱邱山懸車告老四  
門備禮閑心靜居大將軍何公司徒袁公前後招辟使人

曉諭云欲特表便可入踐常伯超補三事紆佩金紫光國  
垂勲先生曰絕望已久飾巾待期而已皆遂不至宏農楊  
公東海陳公每在袞職羣僚賀之皆舉手曰潁川陳君命  
世絕倫大位未躋慚于文仲竊位之負故時人高其德重  
于公相之位也年八十有三中平三年八月丙子遭疾而  
終臨沒顧命畱葬所卒時服素棺櫛財周櫬喪事唯約用  
過乎儉羣公百僚莫不咨嗟巖數知名失聲揮涕大將軍  
弔祠錫以嘉謚曰徵士陳君稟嶽瀆之精苞靈曜之純天  
不憖遺一老俾屏我王梁崩哲萎于時雖憲縉紳儒林論  
德謀績謚曰文範先生傳曰郁郁乎文哉書曰洪範九疇  
彝倫攸敘文爲德表範爲士則存誨沒號不亦宜乎三公  
遣令史祭以中牢刺史敬弔太守南陽曹府君命官作誄  
曰赫矣陳君命世是生含光醇德爲士作程資始旣正守

終有令奉禮終沒休矣清聲遣官屬掾吏前後赴會刊石作銘府丞與比縣會葬荀慈明韓元長等五百餘人總麻設位哀以送之遠近會葬千人以上河南尹种府君臨郡追歎功德述錄高行以爲遠近鮮能及之重部大掾以成斯銘可謂存榮沒哀死而不朽者也乃作銘曰

峩峩崇嶽吐符降神於皇先生抱寶懷珍如何昊穹旣喪期文微言圯絕來者曷聞交交黃鳥爰集于棘命不可贖哀何有極

蔡伯喈郭有道林宗碑

先生名泰字林宗太原界休人也其先出自有周王季之穆有虢叔者實有懿德文王咨焉建國命氏或謂之郭卽其後也先生誕膺天衷聰獻明哲孝友溫恭仁篤慈惠夫其器量宏深姿度廣大浩浩焉汪汪焉奧乎不可測已若

乃砥節勵行直道正辭貞同足以幹事隱拈足以矯時遂  
考覽六籍探綜圖緯周流華夏游集帝學收文武之將墜  
拯微言之未絕于時纓綬之徒紳佩之士望形表而景附  
聆嘉聲而響和者猶百川之歸巨海鱗介之宗龜龍也爾  
乃潛隱衡門收朋勤誨童蒙賴焉用袪其蔽州郡聞德虛  
已備禮莫之能致羣公休之遂辟司徒掾又舉有道皆以  
疾辭將蹈淇崖之遐跡紹巢由之絕軌翔區外以舒翼超  
天衢以高峙稟命不融享年四十有三以建寧二年正月  
乙亥卒凡我四方同好之人永懷哀悼靡所置念乃相與  
推先生之德以圖不朽之事僉以爲先民旣沒而德音猶  
存者亦賴之于紀述也今其如何而闕斯禮于是建碑表  
墓貽銘景行俾芳烈奮乎百世令聞顯于無窮其詞曰  
於休先生明德通元純懿淑靈受之自天崇壯幽潛如山



如淵禮樂是悅詩書是敦匪惟摭華乃尋厥根宮牆重仞  
允得其門懿乎其純確乎其操洋洋搢紳言觀其高棲遲  
泌邱善誘能教赫赫三事幾行其招委辭召貢保此清妙  
降年不永民斯悲悼爰勒茲銘摘其光耀嗟爾來世是則  
是效

蔡伯喈貞節先生范史雲碑

先生諱丹字史雲陳留外黃人陶唐氏之後也其在周室  
有士會者爲晉大夫以受范邑遂以爲氏漢文景之際爰  
自南陽來家于成安生惠延熹二年官至司農延尉君則  
其後也君受天正性志高行潔在乎幼弱固已藐然有烈  
節矣時人未之或知屈爲縣吏亟從仕進非其好也退不  
可得乃託死遁去親戚莫知其謀遂隱竄山中涉五經覽  
書傳尤篤易與尚書學立道通久而後歸遊集太學知人

審友苟非其類無所容納介操所在不顧貴賤其在鄉黨也事長惟敬養稚惟愛言行舉動斯爲楷式郡縣請召未嘗屈節其有備禮招延虛已遜止亦爲謀奏盡其忠直以處士舉孝廉除郎中萊蕪長未出京師喪母行服故事服闋後還郎中君遂不從州郡之政凡其事君過則弼之闕則補之通清夷之路塞邪枉之門舉善不拘階次黜惡不畏強禦其事繁多不可詳載雅性謙儉體勤能苦不樂假借與從事荷負徒行人不堪勞君不勝其迺辟太尉府俄而冠帶或以羣黨見嫉時政用受禁錮君懼其罪閉門靜居九族中表莫見其面晚節禁寬困於屢空而性多檢括不治產業以爲卜筮之術得因吉凶道治民情以受薄償且無咎累乃嚮卦于梁宋之域好事者覺之應時輒去禁既蠲除太尉張公司徒崔公前後四辟皆不就仕不爲祿

故不牽於位謀不苟合故特立於時是則君之所以立節  
明行亦其所以後時失途也年七十有四中平二年四月  
卒太尉張公兗州劉君陳留太守淳于君外黃令劉君僉  
有休命使諸儒參按典禮作誄著諡曰貞節先生昭其功  
行錄記所履謀於耆舊刊石樹銘光示來世銘曰

於顯貞節天授懿度誕茲明哲允迪德譽如淵之清如玉  
之素潤之不濁涅之不汙用行思忠舍藏思固伯夷是師  
史鮒是慕榮貧安賤不恣竊逢甘死善道遺名之故身沒  
譽存休聲載路

蔡伯喈袁滿來墓碑

茂德休行曰袁滿來太尉公之孫司徒公之子逸才淑姿  
質天所授聰遠通敏越軌在闕明習易學從誨如流百家  
淑氏遇曰能識事不再舉問一及三具始知終情性周備

夙有奇節孝智所生順而不驕篤友兄弟和而無忿氣決  
泉達無所疑滯雖冠帶之中士校材考行無以加焉允公  
族之殊異國家之輔佐眾偉其器士嘉其良雖則童稚令  
聞芬芳降生不永年十有五四月壬寅遭疾而卒既苗而  
不穗馮殞華英嗚呼悲夫乃假碑旌于墓表嗟其傷矣唯  
以告哀

蔡伯喈胡夫人黃氏神誥

夫人江陵黃氏之季女字曰列羸其先出自伯翳別封于  
黃以國氏焉高祖父汝南太守曾祖父延城大尹祖父番  
禺令父以主簿嘗證太守事奉明君以立臣節漢南之士  
以爲美談初都尉君娶于故豫州刺史卽黃君之姊生太  
傅安樂侯廣及卷令康而卒繼室以夫人生童紀未歲而  
夭夫人懷聖善之姿韜慈母之仁撫育二孤導以義方思

晉先姑神圖時恫故能迄用有成誕膺繁祉廣厯五卿七  
公再封之祿康亦由孝廉宰牧二城九鼎之義夫人是享  
爰暨稚孫更仕三宮或典百里或作虎臣銀艾貂蟬近侍  
顯尊受茲介福于我夫人自郡尉仕于京師及廣兄弟式  
敘漢朝夫人居京師六十有餘載其乘輅執贊朝皇后採  
柔桑于蠶宮手三盆于蘭節者蓋三十年上有帝室寵光  
之休下有堂宇斤斤之祚心耽其榮體安其遠圖長慮迥  
用遺舊居欲留此焉康寧之時亟以爲言太夫人年九十  
一建寧二年薨于太傅府是月辛酉公之季子陳留太守  
碩卒于洛陽左池里舍公銜哀悼祇愼其屬遵奉遺意不  
敢失墜乃俾元孫顯咨度羣儒以考其衷僉曰昔帝舜沒  
於蒼梧殯於虞郊二妃薨於江湖不卽兆于九疑延陵季  
子實惟吳人長子道終卜葬羸博夫遭時而制不遠遷徙

魂氣所之不繫邱壠帝舜以之神罔時怨季札以之仲尼  
嘉焉鑒帝籍之高論綜精靈之幽情稽先人之遐迹順母  
氏之所寧茲事體通而義同允不可替於是公乃爲辭昭  
告先考然後卜定宅兆龜筮悉從遂營窆窆之事舉封樹  
之禮十月旣望粵翌日己酉葬我夫人黃氏及陳留太守  
碩于此高原維陽東界關亭之阿天子使中常侍謁者李  
納弔且送葬持賻錢二十萬布二百疋再以中牢祠羣后  
畢會榮哀孔備于時濟陽故吏舊民中常侍勾陽于肅等  
二十三人思應慕化推本議銘著斯碑石俾諸昆裔瞻仰  
以知禮之用是爲神誥乃申頌曰於穆夫人家邦之媛昔  
在嘉代黃國氏建至于近祖亦降于漢天祚明德福祿流  
衍旣作母儀履信思順登壽耄耄用永蕃嬖子孫以仁追  
稽先典厝茲洛濱齊蹟湘靈配名古人休矣耀光千億斯

年

蔡伯喈胡夫人靈表

夫人編縣舊族章氏之長女也字曰顯章令儀小心秉操  
塞淵仁孝婉順率禮無遺體季蘭之姿蹈思齊之跡永初  
二年年十有五爰初來嫁誕成家道仰奉慈姑竭歡致敬  
俯誨膝下化導周悉至德修於幾微德音暢於神明故能  
參姪姁之功兼生人之榮朝春路寢贊桑蠶宮光寵有翬  
祭服有琬前後奉斯禮者三十餘載夫人生五男長曰整  
伯齊次曰千億叔韓次曰寧穉威次曰碩季獻伯仲各未  
加冠遭厲氣同時夭折叔上郡孝廉季更歷州寧舉茂才  
葉令京令爲議郎季以高第爲侍御史諫議大夫侍中虎  
賁中郎將陳留太守皆早卽世夫人哀悼劬悴由是被疾  
遭太夫人憂篤年七十七建寧三年薨夫人之存也契闊

中饋婉戀供養依生奉仁紹述雅意其閏月附于太夫人  
窀穸于茲地魂而有靈欽明定省神心欣焉其實寧之元  
女金盈追慕永思懜懜罔極遂及斯表鐫著堅珉頌曰悲  
母氏之不永懷殷恤以摧傷惟子道之無窮惜聞誨之未  
央庶黃耆以期頤胡委我以夙喪恒思心以激切亦割肝  
以絕腸昔先聖之遺辭言仁者其壽長嗟母氏之憂患體  
愷悌以慈良失延年之報祐獨何棄於穹蒼日月忽以將  
暮抱長結以含愁尋修念之在昔原疾病之所由遭元子  
之弱天心傷悴以自憂暨叔季之殞終哀情結以彌綢皇  
姑沒而中感遂大漸兮速流疾皸皸而日邁氣微微以長  
浮銷精魂以遐翔曾不可乎援留爾乃順旨於冥冥繼存  
意於不違爰附靈於皇姑尙魂魄之有依潛幽室之黯漠  
惜昭明之景輝一往超以未及傾祖邈其彌遲顧新廟以



累欷伏几筵而增悲嗟既逝之益遠眇悠悠而莫追

蔡伯喈議郎胡公夫人哀讚

議郎夫人趙氏字曰永姜允有令德秉心塞淵舒詳閒雅  
儀節孔備女師四典窈窕德象罔不習熟以供婦道議郎  
早世檢誨幼孤義方以導其性中禁以閑其情孤顯儉節  
以免咎悔少辟侍中襲先公之爵以議郎出爲濟陰太守  
是時夫人寢疾未薨而國家方有滎陽寇賊震驚帝師簡  
選州辟授任進衛不得辭王命親醫藥夫人乃自矜精稟  
氣力俛起若愈以勸遣顥到官月餘所疾暴盛春秋五十  
八中平四年薨于京師顥有剖符之寄偪於國典疾篤不  
得顧親增感氣絕不能自甯慎終之事闕焉永廢雖不毀  
以隨沒亦困悴而傷懷知我如此不如勿生號咷告哀以  
乞骸骨踰年然後獲聽追惟考君存時之命迎棺舊土同

穴此城孤心摧割靡所底念仰瞻二親或有神誥靈表之  
文敢曰亮闇敘我憂痛作哀讚書之于碑愍予小子夙罹  
孔艱嚴考殞沒我在齡年母氏鞠育載矜載憐殷斯勤斯  
慈愛備存匪惟驕之範我軌度教誨嚴肅昭示好惡俾我  
克類畏威忌怒用免咎悔踐繼先祖卽爵其土二將是臨  
與帝剖符守于濟陰夫人寢疾榮此寵休疾用歡痊翊日  
斯瘳將征將邁從養陶邱景命徂逝不愍少留疾大漸以  
危亟兮精微微而浸衰逼王職於憲典兮子孫忽以替違  
目不臨此氣絕兮手不親夫含飯陳衣衾而不省兮合綆  
棺而不見昔予考之卽世兮安宅兆于舊邦依存意以奉  
亾兮遷靈柩而同來考妣痛以燥兮離乖神柩集而移兮  
增哀黃壚密而無聞兮出入閭其無門昇柩在茲兮不知  
魂景之所有悼孤衷之不遂兮思情慄以傷肝幽情淪於

馬二十四  
后坤兮精哀達乎昊乾

王仲寶褚淵碑文

逐節敷敘中郎遺矩羌無鎔裁但苦詞費仲寶休文尚  
疎雋可觀

夫太上有立德其次有立功此之謂不朽所以子產云亾  
宣尼泣其遺愛隨武旣沒趙文懷其餘風於文簡公見之  
矣公諱淵字彥回河南陽翟人也微子以至仁開基宋段  
以功高命氏爰逮兩漢儒雅繼及魏晉以降奕世重暉乃  
祖太傅元穆公德合當時行比州壤深識臧否不以毀譽  
形言亮采王室每懷沖虛之道可謂婉而章志而晦者矣  
自茲厥後無替前規建官惟賢軒冕相襲公稟川嶽之靈  
暉含珪璋而挺曜和順內凝英華外發神茂初學業隆弱  
冠是以仁經義緯敦睦於閨庭金聲玉振寥亮於區宇孝

敬淳深率由斯至盡歡朝夕人無間言逍遙乎文雅之圃  
翱翔乎禮樂之場風儀與秋月齊明音徽與春雲等潤韻  
宇宏深喜愠莫見其際心明通亮用言必由於已汪汪焉  
洋洋焉可謂澄之不清撓之不濁袁陽源才氣高奇綜覈  
精裁宋文帝端明臨朝鑒賞無昧袁旣延譽於遐邇文亦  
定婚於皇家選尚餘姚公主拜駙馬都尉漢結叔高晉姻  
武子方斯蔑如也釋褐著作佐郎轉太子舍人濯纓登朝  
冠冕當世升降兩宮實維時寶具瞻之範旣著之衡之望  
斯集出參太宰軍事入爲太子洗馬俄遷祕書丞贊道槐  
庭司文天閣光昭諸侯風流藉甚以父憂去職喪過乎哀  
幾持毀滅有識留感行路傷情服闕除中書侍郎王言如  
絲其出如綸恪居官次智效惟穆于時新安王寵冠列蕃  
越數邦教毗佐之選妙盡國華出爲司徒右長史轉尚書

吏部郎執銓以平御煩以簡裴楷清通王戎簡要復存於  
茲秦始之初入爲侍中曾不移朔遷吏部尚書是時天步  
初夷王途尚阻元戎啟行衣冠未緝內贊謀謨外康流品  
制勝旣遠涇渭斯明賞不失勞舉無失德績簡帝心聲敷  
物聽事寧領太子右衛率固讓不拜尋領驍騎將軍以帷  
幄之功膺庸祇之秩封雩都縣開國伯食邑五百戶旣秉  
辭梁之分又懷寢邱之志所受田邑不盈百井久之重爲  
侍中領右衛將軍盡規獻替均山甫之庸緝熙王旅兼方  
叔之望丹陽京輔遠近攸則吳興矜帶實惟股肱頻作二  
守竝加蟬冕政以禮成民是以息明皇不豫儲后幼冲貽  
厥之寄允屬時望徵爲吏部尚書領衛尉固讓不拜改授  
尚書右僕射端流平衡外寬內直宏二八之高謨宣由庚  
而垂詠太宗卽世遺命以公爲散騎常侍中書令護軍將

軍送往事居忠貞允亮秉國之均四方是維百官象物而  
動軍政不戒而備公之登太階而尹天下君子以爲美談  
亦猶孟軻致欣於樂正羊職悅賞於士伯者也丁所生母  
憂謝職毀疾之重因心則至朝議以有爲爲之魯侯垂式  
存公忘私方進明準爰降詔書敦還攝任固請移歲表奏  
相望事不我與屈已宏化屬值三季在辰戚蕃內侮桂陽  
失圖窺窬神器鼓棹則滄海振蕩建旗則日月蔽虧出江  
派而風翔入京師而雷動鳴控茲於宗稷流鋒鏃於象魏  
雖英宰臨戎元渠時殄而餘黨實繁宮廟憂逼公乃總熊  
羆之士率不貳心之臣戮力盡規克寧禍亂康國祚於綏  
旒振王維於已墜誠由太祖之威風抑亦仁公之翼佐可  
謂德刑詳禮義信戰之器也以靖難之功進爵爲侯兼授  
尚書令中軍將軍給班劔二十人功成弗有固秉撝挹改

授侍中中書監護軍如故又以居母艱去官雖事緣義感而情均天屬顏丁之合禮二連之善喪亦曷以踰天厭宋德水運告謝嗣主荒怠於天位彊臣憑陵於荆楚廢昏繼統之功龕亂寧民之德公實仰贊宏規參聞神算雖無受脤出車之庸亦有甘寢秉羽之績乃作司空山川攸序兼授衛軍戎政輯睦旣而齊德龍興順皇高禪深達先天之運匡贊奉時之業弼諧允正徽猷宏遠樹之風聲著之話言亦猶稷契之臣虞夏荀裴之奉魏晉自非坦懷至公永監崇替孰能光輔五君夤亮二代者哉大啟南康爰登中鉉時膺土宇固辭邦教今之尚書令古之家宰雖秩輕於冢司而任隆於百辟暫遂沖旨改授朝端邇無異言遠無異望帝嘉茂庸重申前冊執五禮以正民簡八刑而罕用故能騁績康衢延慈哲后義在資敬情同布衣出陪鑒躅

入奉帷殿仰南風之高詠餐東野之祕寶雅議於聽政之  
晨披文於宴私之夕參以酒德間以琴心暖有餘暉遙然  
留想君垂冬日之溫臣盡秋霜之戒肅肅焉穆穆焉於是  
兄君親之同致知在三之如一太祖升遐綱繆適寄以侍  
中司徒錄尚書事稟玉几之顧奉綴衣之禮擇皇齊之令  
典致聲化於雍熙內平外成實昭舊職增給班劍三千人  
物有其容徽章斯允位尊而禮卑居高而思降自夏徂秋  
以疾陳退朝廷重違謙光之旨用申超世之尚改授司空  
領驃騎大將軍侍中錄尚書如故景命不永大漸彌留建  
元四年八月二十一日薨於私第春秋四十有八昔柳莊  
疾棘衛君當祭而輟禮晏嬰既往齊君趨車而行哭公之  
云亡聖朝震悼於上羣后恇慟於下豈惟哀纏一國痛深  
一主而已哉追贈太宰侍中錄尚書如故給節羽葆鼓吹



班劍爲六十人諡曰文簡禮也夫乘德而處萬物不能害其貞虛已以遊當世不能擾其度均貴賤於條風忘榮辱於彼我然後可兼善天下聊以卒歲經始圖終式免祇悔誰云克備公實有焉是以義結君子惠需庶類言象所未形述詠所不盡故吏某甲等感逝川之無捨哀清暉之眇默餐輿誦於邱里瞻雅詠於京國思衛鼎之垂文想晉鍾之遺則方高山而仰止刊元石以表德其辭曰

辰精感運昴靈發祥元首惟明股肱惟良天鑑璿曜踵武前王欽若元輔體微知章永言必孝因心則友仁洽兼濟愛深善誘觀海齊量登嶽均厚五臣茲六八元斯九內謨帷幄外曜台階遠無不肅邇無不懷如風之偃如樂之諧光我帝典緝彼民黎率禮蹈謙諒實身幹跡屈朱軒志隆衡館眇眇元宗萋萋辭幹義旣川流文亦霧散嵩構云頽

梁陰載缺德猷靡嗣儀形長遞昭悵餘徽銷洋遺烈久而彌新用而不竭

沈休文齊故安陸昭王碑文

公諱緬字景業南蘭陵人也襁褓身佐唐虞有大功於天地商武姬文所以膺圖受錄蕭曹扶翼漢祖滅秦項以寧亂魏氏乘時於前皇齊握符於後靈源與積石爭流神基與極天比峻祖宣皇帝雄才盛烈名蓋當時考景皇帝含道居貞卷懷前代公含辰象之秀德體河岳之上靈氣蘊風雲身負日月立行可模置言成範英華外發清明內昭天經地義之德因心必盡簡久遠大之方率由斯至挹其源者游泳而莫測懷其道者日用而不知昭昭若三辰之麗於天滔滔猶四瀆之紀於地六幽允洽一德無爽萬物仰之而彌高千里不言而斯應若夫彈冠出仕之日登庸

泣事之年軍麾命服之序監督方部之數斯固國史之所  
詳今可得而略也水德方衰天命未改太祖龍躍俟時作  
鎮淮泗如仁夕惕之志中夜九迴龕世拯亂之情獨用懷  
抱深圖密慮衆莫能窺公陪奉朝夕從容左右蓋同王子  
洛濱之歲實惟辟疆內侍之年起予聖懷發言中旨始以  
文學遊梁俄而入掌綸誥蘭桂有芬清暉自遠帝出于震  
日衣青光方軌茅社俾侯安陸受瑞析珪遂荒雲野式掌  
儲命帝難其人公以宗室羽儀允膺嘉選協隆三善仰敷  
四德博望之苑載暉龍樓之門以峻獻替帷扆實掌喉唇  
奉待漏之書銜如絲之旨前暉後光非止恒授公以密戚  
上賢俄而奉職出納惟允劔璽增華伊昔帝唐九官咸事  
熊豹臨戴納言是司自此迄今其任無爽爰自近侍式贊  
權衡而皇情眷眷慮深求煥姑蘇與壤任切關河都會殷

臯提封百萬全趙之衺服叢臺方此爲少臨淄之揮汗成  
雨曾何足稱乃鴻鵠舊吳作守東楚宏義讓以勗君子振  
平惠以字小人撫同上德綏用中典疑獄得情而弗喜宿  
訟兩讓而同歸雖春申之太啟封疆鄧攸之緝熙氓庶不  
能尚也夏首藩要任重推轂衿帶中流地殷江漢南接衡  
巫風雲之路千里西通鄆鄧水陸之塗三七是惟形勝間  
外莫先建麾作牧明德攸在乃暴以秋陽威以夏日澤無  
不漸蟪蛄之穴靡遺明無不察容光之微必照由近而被  
遠自己而及物惠與八風俱翔德與五才並運遠無不懷  
邇無不肅邑居不閒夜吠之犬牧人不覩晨飲之羊譽表  
六條功最萬里還居近侍兼饗戎秩侯府寄隆儲端任顯  
東西兩晉茲選特難羊琇願言而匪獲謝朓功高而後至  
升降二宮令績斯俟禁旅尊嚴主器彌固禹穴神臯地將

分陝江左以來常遷斯任東渚距海南望秦稽淵藪胥萃  
萑蒲攸在貨殖之民千金比屋郛墉之內雲屋萬家刑政  
繁舛舊難詳一南山羣盜未足云多渤海亂繩方斯易理  
公下車敷化風動神行誠恕旣孚鉤距靡用不待赭汙之  
權而姦渠必翦無假里端之籍而惡子咸誅被以哀矜孚  
以信順南陽葦杖未足比其仁潁川時雨無以豐其澤公  
攬轡升車收州典郡感達民祇非待期月老安少懷塗歌  
里詠莫不歡若親戚芬若椒蘭麾旆每反行悲道泣攀車  
臥轍之戀爭塗忘遠去思一借之情愈久彌結方城漢池  
南顧莫重北指嶠道平塗不過七百西接峽武關路曾不  
盈千蠻陬夷徼重山萬里小則俘民略畜大則攻城剽邑  
胥宋迄今有切民患烽鼓相望歲時不息椎埋穿掘之黨  
阡陌成羣傲法侮吏之人曾莫禁禦累藩咸受其弊歷政

所不能裁加以戎羯窺窺伺我邊隙北風未起馬首便以  
南向塞草未衰嚴城於焉早閉永明入載疆場大駭天子  
乃心北眷聽朝不怡揚師漢南非公莫可於是驅馬原隰  
卷甲遄征威令首塗仁風載路軌躅清晏車徒不擾牛酒  
日至壺漿塞陌失義犬羊其來久矣徵賦嚴切惟利是求  
首鼠疆界災蠹彌廣公扇以廉風孚以誠德盡任棠置水  
之清宏郭伋待期之信金如粟而弗覩馬如羊而靡入縱  
雉必懷豚魚不爽由是傾巢舉落望德如歸椎髻疊首日  
拜門闕并服滿塗夷歌成韻禮義旣敷威刑具舉疆民獷  
俗反志遷情風塵不起囹圄寂寞富商野次宿秉停菑蟻  
蝗弗起豺虎遠跡北狄懼威關塞謐靜偵諜不敢東窺駝  
馬不敢南牧方欲振策燕趙席卷秦代陪龍駕於伊洛侍  
紫蓋於咸陽而遭疾彌留歎焉大漸耕夫釋耒桑婦下機

參請門衛竝走羣望維永明九年夏五月三十日辛酉薨  
春秋三十有七城府颯然庶僚如賞男女老幼小臨街衢  
接響傳聲不踰時而達於四境夷羣戎落幽遠必至望城  
拊膺震動郛邑竝求入奉靈輓藩司抑而弗許雖鄧訓致  
勞面之哀羊公深罷市之慕對而爲言遠有慙德神駕東  
還號送踰境奉觴奠以望靈仰蒼天而自訴震響成雷盈  
塗咽水公臨危審正載貽話言楚叢之請惟幾而彌固衛  
魚之心身亡而意結二宮軫慟遐邇同哀追贈侍中領衛  
將軍給鼓吹一部諡曰昭侯時皇上納寵在辰登庸伊始  
允副朝端兼掌屯衛聞凶哀震感絕移時因邁沈疴緜留  
氣序世祖日夜憂懷備盡寬譬勉膳禁哭中使相望上雖  
外順皇旨內殷私痛獨居不御酒肉坐臥涕泣霑衣若此  
移年癯瘠改貌天倫之愛振古莫儔及俯膺天眷入纂絕

業分命懿親台牧竝建對繁弱以流涕望曲阜而含悲改  
贈司徒因諡爲郡王禮也惟公少而英明長而宏潤風標  
秀舉清暉映世學偏書部特善元言盤悅之麗篆籀之則  
窮六藝於懷抱究八體於豪端奕思之微秋儲無以競巧  
取睽之妙流睇未足稱奇至公以奉上鳴謙以接下撫僚  
庶盡盛德之容交士林忘公侯之貴虛懷博納幽關洞開  
宴語談笑情瀾不竭譽滿天下德冠生民蓋百代之儀表  
千年之領袖曾不慙畱梁摧奄及豈惟僑終蹇謝興謠輟  
相而已哉凡我僚舊均哀其戚怨天德之無厚痛棠陰之  
不畱思所以克播遺塵敝之穹壤乃刊石圖徽寄情銘頌  
其辭曰

天命元鳥降而生商是開金運祚始玉僅三仁去國五曜  
入房亦白其馬俟服周王本枝派別因采命氏涉徐而東



義均梁從自茲以降懷青拖紫崇基巖巖長澗瀾瀾惟聖  
造物龍飛天步載鼎載革有除有布高皇赫矣仰膺乾顧  
景皇蒸哉實啟洪祚喬嶽峻峙命世興賢應期誕德絕後  
光前幾以成務覺在民先位非大寶爵乃上天爰始濯纓  
清猷濬發升降文陛逶迤魏闕惠露霑吳仁風扇越沙夏  
踰漢政成期日用簡必從月新爲盛在上哀矜臨下莊敬  
草木不天昆蟲得性我有芳蘭民胥攸詠羣夷蠢蠢巖別  
嶂分傾山盡落其從如雲挈妻荷子負戴成羣迴首請吏  
會何足云昔聞天道仁罔不遂彼蒼如何興山止黃四牡  
方馳六龍頓轡斯民曷伸邦國殄瘁齊頌異平行哭致禮  
趙祖昌國列邦揮涕況我君斯皇之介弟哀感徒庶慟興  
雲陛階毀雷攢川汎歸軰競羞野奠爭攀去轂遵渚號追  
臨波望哭無絕終古惟蘭與菊塗由帝渚朱軒靡駕東首

瑩園卽宮長夜逝川無待黃金難化鐘石徒刊芳猷永謝  
庾子山周太子太保步陸逞神道碑

子山諸篇密藻麗思無以復過而每以纖仄爲累

公諱逞字季明本姓陸吳郡人也君子至止旣紹虞賓鳳  
凰于飛實興齊國南越使者解漢帝之衣西陵將軍覆吳  
王之蓋曾祖載爲宋王司馬留鎮關中赫連之亂仗劒魏  
室黃河參凌或亡追路烏江艤船更無歸迹今爲河南洛  
陽人也高祖冠軍將軍營州刺史吳人有降附者悉領爲  
別軍自是官帥擁鐸更爲吳越之兵君子習流別有樓船  
之陣文政驍騎大將軍儀同三司恒州刺史中都獻公太  
祖扶危濟傾經綸夷阻報君之耻遠襲平原以高平霸業  
所基委命留事關中餽食非直滎陽之師河內供軍豈但  
淇園之竹公秉照晉之靈降神明之德猛虎振檻七年不

驚羝羊觸藩九齡能對諸兄以公先君愛子稱之曰仁推而襲封雖復季未大成矢心守節旣遭燠穴翻從壓紐太祖初封函谷始合諸侯以公辭令參謀機密故得戎政克宣師言無漏賜姓步陸孤氏委鹿輅而論都入鴻門而舞劒方之吹律綽有餘榮出身羽林監輕車將軍除尚書右丞官聯會計務應平準水衡貫朽長平粟紅授使持節車騎大將軍儀同三司增邑千戶尋遷駕部中大夫領吏部中大夫歷蕃部御伯東京鼎寶先加鄧騭之勲西晉官人多用山濤之啟豈若五王登朝必司賓主之禮六龍御轡取定鸞和之節御正以官觸父名不拜會稽有王會之名其子不爲太守博陵有王沈之封其兒不爲刺史遷驃騎大將軍開府入掌納言治司宗伯又爲軍司馬職居常伯勤問於南宮位管王言連官於北斗豈止郊天祀地龍門

嶰谷之聲贊鼓頌旗白露涼風之月暗夜有人餉羅數十  
匹公閉門不受行人于綱具以聞奏朝野稱之太尉楊震  
直推故吏之金涼州張奐高揖羌人之馬清畏人知我無  
慙德齊國通和封人受懷以公有出境之才見命張旌之  
禮旣珠盤插血定楚國之連名七首登壇反齊人之侵地  
是謂陳平固稱光國三輔公侯五陵鐘鼎銅街柳市塵起  
風飛乃授京兆尹增邑通前一千六百戶餘官如故上林  
兵息蘭池盜靜不學王陽平生鑄金之術米同張敞終日  
章臺之遊家僮暮行還得遺錢於道并白繩十疋公訪得  
其主卽以還之見金於路指以示人得錢於道持留掛樹  
方之今日異代同風俄遷司會治小司馬重總六軍再操  
八柄考績入於歲成論功書之年表尋授都督宜州諸軍  
事宜州刺史露冕觀風停車待雨百城解印憚朱轡之威

千里相迎愛王基之德曾未期月被勅追還眷眷吏民不  
無河內之請依依故老實念黎陽之別少陽養德前星守  
器尊師讓齒必俟賢能乃授太子太保方之劉實道高於  
大邦譬以山濤榮深於小輦本有消渴之疾常餌金石自  
理舊疾微增奄捐館舍茂陵之下不留封禪之書校尉之  
營惟餘服食之器嗚呼哀哉春秋四十有七建德二年五  
月十一日也天子以大臣之喪躬輟聽訟東朝以師傅之  
尊親臨攢祭詔贈大將軍諡某公禮也以今三年正月十  
日葬於京兆之高陽原夫人郁久閭西遇王姬愛敬肅恭  
言容令淑有聞箴盟無廢紘紼爰在盛年先從大夜今節  
婦開墳松柏已拱季孫成寢邱陵始同况復圖畫賢妃方  
在甘泉之室瘞埋才子卽用高陽之原公儀表外明風神  
內照器量深沈階基不測事君惟忠事親惟孝言爲世範

行爲士則留連墳素怙悵文詞霜府錄於尚書天官總於  
司會出入匡贊常帶數職身具六龜腰恒四綬陳平密謀  
旣非天子所見荀彧上策又非諸侯所聞其爲郡也惟取  
赤土封書其爲州也惟以青鹽換粟留家則千樹無資遺  
子則一經而已嫡子操至性過禮純孝不遺墳前之樹染  
淚者先枯庭際之禽聞悲者則下銘曰

山連日觀水枕滇機富春沙起開陽柱飛大夫屈節將軍  
振威南越受吏西陵解圍昔我烈祖垂翼秦中白馬無路  
烏江不通笛吟鄉里琴哀土風營州恒州擁旄世載壯節  
旂衿人雄關塞直河穿趙平雲臨代生謂立功沒爲留愛  
降茲嶽瀆誕此貞明祥符雲氣慶台星精宮惟定策殿柱  
書名忠泉暗漏孝筭寒生世屬殷周時逢楚漢天下三分  
鴻溝一半以我明略來參匡贊日乃再中天成兩旦遞參

三事厯副六卿天師光宅地載謨明春官定禮夏官治兵  
讖言默識溫樹無名謙恭周密言行無乖忠公兕殪陰德  
蛇埋軍國紛總部領填階馬不入廐金不入懷具瞻惟德  
高山惟仰甲觀初登龍樓初上東國桓榮西京疎廣年齡  
俄頃風電相摧銘旌兩沒池柳雙迴煢煢允子在疚衞哀  
身彰野火心懼天雷日月其除榮終哀始馬歸司隸書還  
太史厯對天星墳連地市山勢接飛松形益起德音無絕  
平原忽矣

庾子山周大將軍司馬裔碑

公諱裔字遵允河內溫人也昔顓頊之命始則南正司天  
重黎之後又以羲和掌厯夏陽適晉得隨會而同奔東海  
避秦與毛公而俱隱其後金行受命玉笥南遷帝系極於  
輿圖中朝至於江表會祖楚之晉太傅錄尚書揚州牧會

稽文孝王之次子元顯之幼弟也元顯見害之後桓元篡  
逆之初爰自齟齬客身屠釣河內道左抱劍長號代郡城  
前勵悲靈祭江淮志節之士汝頴風塵之客感激一言咸  
多依附旣而雲生伏鼉星出鯨魚太白經天蚩尤映野公  
乃收合餘燼泣血登陣臨武牢之關據成臯之坂擁衆萬  
衆歸於魏室魏明元皇帝遙授平南大將軍荊州刺史襲  
封瑯琊郡王尙河內公主命王承制從賓國之儀於時宋  
兵憑陵旗鼓侵逼虎牢不封金墉無援魏太武皇帝授王  
使持節侍中安南大將軍開府儀同三司給前後部鼓吹  
元戎啟行志雪冤耻登壇慷慨三軍掩泣黃河漕粟已出  
石門白馬連旗將臨野坂旣而雲中析起代郡烽然反旆  
南園途窮北略賄征西大將軍都督梁益秦寧荆兗青豫  
郢洛十州諸軍事揚州牧司徒諡貞王祖金龍封瑯琊鎮



西大將軍儀同三司吏部尙書贈司空謚康王父悅鎮南將軍豫州刺史漁陽莊侯以荆河刺舉時值亂離歟起蕭牆遂終非命公遺腹載誕流離寇逆複壁襁負深山擁樹程嬰之匿趙武從役家臣王成之藏李燮爲傭酒市遭太夫人憂苦草墳塋以終灰燼形骸毀瘠逾於喪禮年十有五始幹家事櫺前鑿柱卽取遺書石上開松仍求故劒出身司徒府參軍除中堅將軍員外散騎常侍值魏室多難所在蜂起孟津以北無復封畿嵩山以南卽爲鋒鏑公建議修武立柵溫城函谷西封河橋北斷長亭籍馬並入武城百里租車咸輸溫縣太祖文帝締構關都經綸夷阻招攜以禮懷遠以德馬文淵之擇主去隴坻而歸身竇周公之入朝在河西而奉詔大統七年蒙授平東將軍北徐州刺史十年河內故義四千餘家願立忠誠須公衣錦乃授

使持節領河內太守加前將軍懷州拓境兩鎮奔波柳泉  
轉戰三城授首十三年太祖召山東諸立義之將能率衆  
入關者有加重賞公率先而至領戶千室卽以爲封固辭  
不受其菽粟之賜或以指囷馬牛之賞將同量谷朝廷以  
華陽西極漢水東流歎孟達之奔兵怪劉封之失策魏前  
元年移鎮漢中除白馬城主領華陽郡守昔稱導漾今聞  
上瀝煙沈火井雨歇雲門其年授大都督加散騎常侍柱  
國蜀國公開金牛之道通牧馬之關公卷甲北塞懸軍東  
馬遂得策預葭萌勲參綿竹封龍門縣開國子蒲州刺史  
仍領新州尋授使持節車騎大將軍儀同三司大中正隆  
周授圖天保定以公才望仍爲舊臣遂乃義深追遠恩  
隆繼絕卽改封瑯琊縣公邑五百戶仍遷驃騎大將軍開  
府儀同三司都督巴州諸軍事巴州刺史武成二年被勅

赴援信州魚復道阻屢却岑彭荆門水急幾沈吳漢公乃  
月峽先登瞿唐直上天子以公操履忠勤儀刑亮直乃徵  
爲大御伯尋轉大御正邑一千一百戶樞機近侍出納絲  
言所謂多識舊章殿中無雙者矣四年大軍東討公所領  
義衆先守枳關授都督懷州諸軍事懷州刺史偃師張幕  
河陽牧馬雖接戰於富平已連營於官渡五年詔追還拜  
始州刺史更討信州賊山彰尋寶渝恃險峽路五尺絙釣  
纜通縣水三門橋飛齊渡旣而風行草偃谷靜山空前後  
平十一城獲九千餘口馬歸平樂金輸水衡天保二年除  
信州刺史都督信州諸軍事朝發白帝暮宿江陵氣振巴  
邱之兵威警建平之戍五年遷潼州刺史益州柱國公降  
帝子之重鎮天井之星延閣擬於叢臺岷山方於代郡公  
仰稟雄謨參謀遠略故得身預舞陽之功位極長平之寵

六年授使持節大將軍大都督西寧州諸軍事西寧州刺史方欲關沫若徼牂牁見夜郎之侯習昆彌之戰而飛鳶墮水馬援去而無歸金馬騁光王褒行而不反嗚呼哀哉七年正月十日薨春秋六十有五詔贈使持節大將軍懷邵邠晉四州諸軍事懷州刺史夫人襄城公主魏獻帝之曾孫趙穆王之季女王姬肅恭禴翟禮典四教兢莊三星令淑有光隆慮之賢足表平陽之盛生則從夫以秩死則同穴以禮建德元年八月十二日合葬於武功三時原大夫墓樹以柏諸侯墳高於雉吁嗟滕公來居此里詔謚定公禮也公資忠履孝蘊義懷仁直幹干尋澄波萬頃蓬蒙射法力收兵書星辰高下之占風雨逢迎之氣故得師出以律天幸將軍者也至如官曹案牘未嘗煩雍戎馬交馳不妨餘裕足使四岳彌峻三台更明在朝四十一年身經

一百餘戰凡任四郡厯八州未嘗以貨殖經懷去如始至  
渭南千畝之竹更懼盈滿池陽二頃之田常思止足身歿  
之日家無餘財素車白馬狹室崎嶇黃腸元甲階庭仄陋  
有詔冬官爲營寢室朱邑祭酹無所漢后是以賜金陳表  
妻子露立吳王爲之開館嗚呼哀哉世子侃孝家忠國揚  
忠顯親是以勒此豐碑懼從陵谷植之松柏不忍凋枯銘  
曰

欽若厯象平秩寅賓少梁奔華地入咸秦族夷興馬書窮  
獲麟玉鏡云始金行乃構象浦通關龍沙開候上糝石起  
河陽水關五馬南浮三星冬宿太傅作牧奄有江沱司徒  
避亂承制荆河南勞推轂猶思枕戈龍媒被野蒼兕凌波  
莊侯季年禍機相接誕公遺嗣崎嶇懷挾山竄趙武家藏  
李燮伍員道阻燕丹路遙南奔楚塞北避秦橋水流登隴

寒風度遼有功都護則重嫖姚懷書上馬習禮從容陣圖  
六甲兵占八風藏松寶劒射柳珣弓推誠賈復屈節廉公  
入翼頻飛六條亟秉勇此仁義行茲寬猛持印山開沈黎  
盜靜取甲無邱均田不井懋功賜爵上將賞官軍中受詔  
塞外登壇方屠參合更鑿臯蘭渝川毒水熨道災氛地亡  
都尉離悲使君谷寒無日山空足雲北風吹旄秋霖泣軍  
遣奠雙設銘旌兩布沁水同墳平陽合墓悲哀嗣子攀號  
靡訴慟甚風枝悲深霜露自此何世從斯幾年麒麟欲關  
華表中然地形樓起松心蓋圓茫茫邱壠代代英賢

庾子山周柱國長孫儉神道碑

蓋聞放勳立而羲和昇重華登而元凱用思皇多士旣成  
西伯之功俊德克明乃定南巢之伐是知惟賢非后勿食  
惟后非賢弗久若夫君臣一德啟心沃心見之昌寧文公

矣公諱儉初名慶明恒州高陸人也北岳天孫之星燕河  
帝子之國故多奇節甚茂華風高闕圖南二王齊軫長城  
拔本十族分源高祖太尉北平王光輔五君允釐百揆恒  
衛旣從淮沂其乂祖豹龍驤將軍恒州刺史常山刺舉非  
無取代之符龍驤總戎或似平吳之號父馘年止弱冠榮  
終解印公以五常蘊智六氣資德乘天則策馬秉靈降神  
則牽狼應象直心于物水火恬然無負于天雷霆不懼富  
貴自取豈資唐舉之言聲名有聞無勞李膺之識年十八  
解褐員外散騎侍郎尋授輕車將軍羽林監太祖文皇帝  
駕馭天綱苞羅英傑選公才德光佐尚書諸葛亮之西歸  
王壘成三分之業管夷吾之入仕葵邱有一匡之功天水  
黠羌漁陽羣盜乃遷秦州長史防城大都督封信都縣開  
國伯三年滑州蟻聚保障沈命靡旗亂轍乘冰渡河丞相

大行臺假節撫軍行滑州刺史大統元年授持節西夏州  
刺史加散騎常侍郅支抱馬如聞耿秉之戰單于願識似  
畏王商之威五年遷使持節鎮東將軍都督東北三夏諸  
軍事西夏州刺史增邑千戶改伯爲公旣而江漢遼遠車  
書寂寞蜀主的顱未出檀溪之水秦王飛雉猶向南陽之  
城六年以公爲使持節都督三江三襲南雍平信江隨郢  
湘十二州諸軍事荊州刺史東南道行臺僕射楚城鄰境  
實有讓田吳人對營無妨贈藥部內屬城爲人所訟公遂  
集文武肉袒自罰兄弟不讓延壽責躬吏民有過翁歸引  
咎天子異之璽書勞問贈賄加幣王人接踵大丞相書云  
此之美事耳目之所未經歎尙無極故遣專使公善于撫  
馭長于接引山藪無棄苞苴不行示人赤心與人顏色盜  
不敢發民不忍欺至是將校耆老于州城之南起清德之



樓勒賢臣之頌杜鎮南之作牧當世樹碑竇車騎之臨戎  
生年刻石方之今日彼獨何人于時戶口日增荒萊畢墾  
華實紛敷黔黎茂豫但恐衮職有關待公而補鼎鼐未和  
須公而正是以漢殷民望荆南杞梓並皆上書詣闕連名  
乞留河內之借寇恂更慙謁帝交州之請士燮還著上表  
九年授車騎大將軍儀同三司十二年除大行臺尙書仍  
爲大丞相司馬以公識度嚴明志節清儉遂改公名儉字  
慶明非關書月詎待看碑幸得千畝不同二山無廢十三  
年加開府餘官如故十四年除尙書右僕射加侍中進驃  
騎大將軍居上星執法在文昌之位以公才望兼而有之  
十五年更除東南道行臺僕射都督十五州諸軍事行荆  
州事十六年大丞相總十六軍剋清河洛公又中分麾下  
參謀幃幄高選霸僚公爲長史其年加都督南道三十六

州諸軍事餘官如故南陽文學更遇王基章華衮衣還迎  
郭賀昔日伐蜀之謀張儀與秦昭計合平吳之利羊祜與  
晉武意同太祖始定成都卽有江陵之志公密獻其策懸  
符深旨糧運久積梯衝立備一戰而舉鄢郢再戰而燒夷  
陵遂得席卷三荆此又公之勲也詔賞奴婢三百口太祖  
與公書云由公立計果如所謀令公作鎮江陵以安蜀地  
後魏二年改武川昌寧郡開國公厯陽居民非惟景丹之  
封曲逆戶口豈但陳平之國其年授大將軍太和之中曹  
真于府內受冊元封之末衛青于軍中卽拜公之此比綽  
有餘榮詔曰吳人未復須助謀謨今使梁王兵馬受公節  
度三年加都督東南道五十二州諸軍事增邑萬戶維周  
革命光宅欽明作貳天官允諧邦治元年授小冢宰保定  
二年治蒲州刺史檢校六防諸軍事四年治襄州仍授柱

國大將軍餘官如故秩登四岳階平六府豈不功重昭陽  
名高蔡賜控馭五十州風行數千里拔園葵而去織婦無  
三惑而絕四知一室之中未免虛白日膳之資三杯而已  
詔賜綰綵一千段粟麥二千斛天和元年陝州刺史都督  
八州二十防諸軍事解荊州總管餘悉如故路出王宮城  
臨河曲成清陝右高視棠陰部領宴煩晦明爲疾天和四  
年謝病故京薨于私第春秋七十有八鑾蹕降臨軒懸輟  
樂九旒龍旆之錫三河騎士之送詔贈太保涼夏靈銀長  
河鄯甘瓜十州諸軍事涼州刺史諡曰文公狀貌邱墟風  
神磊落玉山秀立喬松直上煙霞之涯際莫尋江海之波  
瀾不測少遭荼苦在山服終攀柏樹枯侵松獸死盡忠事  
國竭力從政其門如市其心若水奇策密謀百僚仰止忠  
貞亮直明王敬焉至如風后陰陽之占力牧星辰之度魏

公子之兵書李將軍之射法莫不成誦在心取爲時用居  
常服翫或以布被松牀盤案之間不過桑杯石鼎遺令山  
陵一無所用公私贈襪並不得受止依太祖陵側無忘事  
君數等兄並至性善居喪號慕墳塋奉遵遺訓是以衛青  
之塚仍陪漢武之陵管仲之墳卽接齊桓之墓天和六年  
天子以四海未寧三方鼎峙有懷將帥之志言念封疆之  
臣旣畫雲臺乃題麟閣更贈公爲鄆國公邑五千戶追崇  
列辟事極神魂再改銘旌恩隆封墓公在民留愛身後見  
思吉日良辰郊祠野祭儀同趙超等六百九十七人表求  
立廟陳請象魏有詔許焉桂棟杏梁綠墀青瑱按歌會舞  
鳳蓋霓裳南浦送而行雲東風颭而零雨是知漢陽郡前  
非徒武侯之廟臨淄城下豈獨樂公之社嗚呼哀哉乃爲  
銘曰

道鍾屯剝世屬雲雷地軸左轉天關北開客車周室繫馬  
秦臺乃齊七政爰啟三才烈祖變諧九龔梁棟取才逢獵  
求賢入夢匡贊官雲謀猷紀鳳律定公族珪分職貢乃惟  
嗣德實秉英靈身圖斗宿面繞樞星青衿敬業童子離經  
信陵虛右干木分庭忠孝純深樞機周密孔光不言曹參  
勿失溫席扇枕承顏悅膝東浦魚驚寒林笋出蕭蕭風正  
沉沉器局直似貞筠溫如瑞玉清不置水明不舉濁馬願  
如羊金須似粟上將克昇元戎旣序夏陽三捷夷陵一舉  
憑軾下齊陵江入楚鼎反厯室鐘歸大呂六卿咸事天官  
是司二南作伯棠陰實治清風有頌綠竹聞詩贈行之冊  
超然帝師昔侍蘭苑今陪杏林生死契濶無違一心風雲  
積慘山陣連陰陵田野寂松徑寒深夏嬰之隴僑元之墓  
馬見千年車回三步左無長樂前非武庫直望高碑增悲

行路

庾子山周車騎將軍賀婁公神道碑

昔者軒邱命氏初分兄弟之姓若水降居始建諸侯之國  
自是以官爲族因地爲宗水派枝分其可知矣公諱慈字  
元達本姓張清河東武城人也仕于周張仲爲孝友謀于  
晉張彥爲賢臣韓有開地則五世強國趙有孟談則三卿  
不戰祖慶少習邊將仗智勇雖復五車竹簡不取博士之  
名一卷兵書卽以將軍自許角端在手必無齊魯之侵蓮  
花插腰甚得蛟龍之氣爲車騎大將軍儀同三司散騎常  
侍霸城縣開國伯贈河州刺史父璨公子公孫有鑑基于  
天下良弓良冶有世業于家風書則百家可知劍則千人  
可敵三槐以龜鼎象物知其神姦五等以桓珪班瑞守其  
宮室君以才望兼而有之終于使持節車騎大將軍儀同

三司散騎常侍武定縣開國公贈池州刺史惟公秉山岳  
之靈受星辰之氣年在髫髻甫就勝衣竹馬來迎已知名  
于郭伋羊車在道卽見賞于王澄豈直童子明經書生說  
卦而已至如禪河清論秋水高談故以辨折龜林聲馳鹿  
野國家官族君爲首姓起家車騎大將軍儀同三司襲爵  
爲公增邑合一千六百戶弱冠登朝傳呼甚寵漢魏台鼎  
故無此比中朝方伯罕有其年大冢宰任總機衡是勤王  
略惜君忠壯委以爪牙乃領左廂親信出爲梁州防主華  
陽西極漢水東流巴濮旣寧沈黎卽靜保定四年王師北  
伐以君驍勇被召將兵師下宜陽身登函谷將燒白馬之  
城以覆鳥巢之壘旣而中途甚雨未獲圍原軍師聞喪不  
成侵宋柱國趙王今上之第九弟也文則河間上書武則  
生城置陣作鎮岷邱揚旆錦水白虎之俗難安黃龍之盟

不定以君智略入佐中權天和元年授使持節大都督上柱國總府司錄仍轉司馬餘官封如故相如西喻鏤石于靈山武侯南征浮船于瀘水方之今日彼獨何人九品課工爲上之下四年入朝歸事宰旅卽受載師大夫將命齊國尋盟出境卽用和鄰之儀入國聞喪仍從會葬之禮可使南面此之謂乎尋以本官入治軍正至如渭水兵書在心爲志軒邱陣法聚石成圖旣得師不疲勞兵無怨讟入陪中禁更領儀同邸客城池門闢戶籍咸資巡警並用司存帝城近臣公室密戚如逢司隸似畏都官旣而孤城鄭姬不相其年已水涪翁不醫其疾春秋三十有三奄捐官舍呂子明之疾甚歎軫吳王阮元瑜之長逝悲深魏主有詔贈某官禮也以建德四年三月日歸葬于河州苑川郡之禁山公六郡良家西河鼎族地壯金行人雄塞氣兵書



七卷河水浮來射法三篇天弧夜下鋒旗不息刁斗恒驚  
猶得馬上讀書軍中習禮太史子義善于謀策諸葛公休  
長子撫馭四代儀同三司七世河州刺史鐘鼎成列冠蓋  
連陰所謂生爲貴臣死爲貴神者也但以游魂久客反葬  
途遠道阻山長妻孤子幼哀聲滿野愁氣連雲況復松楸  
飄飆方臨武威之戍邱陵迴遠直對臨洮之城馬援亡于  
武溪尸柩反于魏里梁鴻死于會計妻子歸于平陵嗚呼  
哀哉崎嶇遠矣昔者繁昌祠前卽有黃金之碣德陽墓下  
猶傳青石之碑是謂勒功乃爲銘曰

七葉佐漢五世相韓忠臣入仕孝友當官青城仙洞黃石  
祠壇臺堪走馬書足迴鸞武定風機霸城嚴肅並馳雙傳  
俱分兩竹重世刺舉連鑣袞服草靡青邱風馳赤谷世不  
乏賢挺茲上嗣孝有三德忠無二志劒足身挺書堪面試

旂節旣秉高蟬且珥龜轉印函虵盤綬笥左右將軍前後  
常侍繼踵五侯因循三事旂旃九坂艫舳雙流還驅木馬  
更引金牛江波錦落火井星浮樽酒望帝安歌蜀侯受脤  
河陽偏師洛浦署陣成臯連旗廣武朝兵滅竈夜營多鼓  
箭起六塵鋒推九虎候忽人世俄然今古崇發兩星鑒驚  
二豎游魂通夢言反舊塋紫泥賜冊黃腸贈行途登石紐  
路入金城塞關樹直秋塞雲平劒埋合柱書藏鑿楹武侯  
爲廟藥公爲社雲蓋低臨霓裳紛下碑枕金龜松橫石馬  
永矣身世留名華夏

溫鵬舉常山公主碑

敬泰微之層構闢閭闔之重扉據天下以爲家苞率土而  
廣宅然則崑山西峙爰有夜光漢水東流是生明月公主  
秉靈宸極資和天地芳芬有性溫潤成質自然祕遠若上

元之隔絳河直置清高類姮娥之依桂樹令淑之至比光  
明於宵燭幽閒之盛匹穠華於桃李託體宮闈而執心撫  
順婉然左辟率禮如賓執華燭以宵征動鳴佩而晨去致  
肅雍於車乘成好合於瑟琴立行潔於清冰抗志高於黃  
鵠停輪表信闔門示禮終能成其子姓貽厥孫謀而鐘漏  
相催日夜不息川有急流風無靜樹奄辭身世從宓妃於  
伊洛遽捐館舍追帝子於瀟湘銘曰

龍轡莫援日車遂往奄離形神忽歸邱壤祖歌薤露出奏  
巫山永厝中埜終掩窮泉蕭瑟神道荒涼墓田松楸徒列  
琬琰空傳